



Wantok



Namba 2028 Julai 11 - 17, 2013 28 pes

Niuspepa Bilong Yumi Ol PNG Stret!

K1 tasol

7pm - 7am
19¢
/MB
TELKOM PNG
Change More

ENJOY FASTEST
INTERNET SPEED



247 Customer Care: Call 343 8789 or www.telkom.png

KISIM NIUELA
3G HUAWEI
MEDIAPAD
LITE

Bai ikam wantaim
wanpla mun FRI
Data Pass (500MB)
wantaim FRI SIM

FRI
500MB
DATA

FRI
SIM



HUAWEI MEDIAPAD LITE

BIPO EM ~~K564~~

NAU EM
K449

Stocks bai istap lo
liklik taim tasol! Kisim
now lo ol retail stoa na
ol authorized dealers.

Digicel

3G DIGICEL.PNG.COM

Wantok pairap!!



OL MANMERI long ol liklik rot-sait maket stat long Tapo i go olgeta long Walium long Madang-Ramu Haiwe i save gut tru long **Wantok Niuspepa**. Poto i soim ol manmeri long Kawawar rot-sait maket i amamas tru long soim fri **Wantok** ol i kisim long Ramu NiCo wok-man husat i bringim i go long ol. Ramu NiCo Menesmen (MCC) i save kisim ol pepa i givim aut long rot i go antap long Walium. Dispela em bikos Ramu NiCo i gat wanpela pes long niuspepa olgeta wik long givim infomesen long Projek na em i laikim ol pipel long Impekt eria bilong Projek i mas save long wok em i mekim.

Planti ol lain long ples i save amamas long ridim ol nius bilong PNG, ovasis, bisnis na spots long pepa long tok-ples bilong PNG stret. **Poto na stori: JAMES KILA**

PM Opim dua long senisim loa...

- Seksen 124 bilong daunim palmen sindaun de kam long 40
- Seksen 145 bilong givim 3-mun notis pepa long kamapim vot nogat bilip

Stanley Nondol i raitim

PRAIM Minista Peter O'Neill i opim rot pinis long kamapim senis long mama loa bilong kantri we toktok

long namba bilong de palamen bai sidaun long wanwan yia na long vot nogat bilip agensim praim minista. Praim Minista long aste long palamen, i givim pinis tupela

notis pepa long kamapim senis long seksen 124 na 145 bilong konstitusen.

I go moa long pes 2...

Liklik China long Basamuk- P3



Plastik fri taun, Tabubil - P11



Stori na piksa bilong SME bung- P20 na 21



Tom Piper
Braised Steak
na Onion!

Teis i stap long bipo yet!!

Planti mit na Swit Moa!

PM opim dua long senis loa

I kam long pes 2...

Mista O'Neill i tok dispela senis bilong loa bai strongim gavman bilong em, na tu ol gavman kam bihain long mekim gut wok na givim sevis long ol pipel husat makim ol na tok i no bilong husat lida i hangere long stap long pawa.

Taim dispela mama loa long seksen 124 i senis bai lukim palamen save sindaun long 63-pela de long wawan yia aninit long loa we bin stap long 37 pela yia bai go daun long 40 pela de tasol long wanwan yia.

Na senis long seksen 145 bai givim tok orait long husat i laik kamapim vot nogat bilip agensim praim minister mas givim notis pepa pastaim na kamapim vote bilong nogat bilip bihain long 3 pela mun.

Oposisen lida Belden Namah, wantaim deputi bilong em Sam Basil, i tok strong olsem dispela senis bai opim dua bilong pasin korapsen insait long kantri na tok oposisen bai salensim long suprim kot long Praim Minista noken kisim go long flo bilong palamen long kamapim senis. Tasol dispela i no kamap yet.

Oposisen strongpela man olsem Sam Basil, memba bilong Kundiawa Gembogl, Tobias Kulang, na Lida Belden Namah i wari tru long dispela senis laik kamap na tok taim senis i kamap bai lukim gavman bilong Peter O'Neill bai gat moa pawa na ken mekim kainkain samting bilong wanem aninit long nupela loa em bai hat long senisim Praim Minista na dispela em pasin bilong korapt lida na lida husat save hangere long stap long pawa.

Bihain long bikpela tokpait long dispela isu long las wik, Praim Minista aste givim notis pepa pinis long kamapim dispela tupela bikpela senis long konstitusen.

Oposisen i gat 7-pela namba tasol na Praim minista Peter O'Neill i gat inap namba stap long kamapim dispela senis.

Long aste na tu long Tude dispela wik taim palamen i sidaun i lukim 3-pela oposisen memba tasol sidaun stap na Lida bilong ol Belden Namah wantaim deputi Sam Basil i no stap long palamen siting na wokman bilong Mista Namah tok lida stap long ovisi na bai kam eni taim long dispela sidaun bilong palamen.

Praim Minista Peter O'Neill i tok klia olsem PNG em fridom kantri na ol memba bilong oposisen wantaim tu husat stap long gavman i gat rait long debat long dispela senis we em laik kamapim. Mista O'Neil tok em gat namba tasol em tok i loa stap we ol memba bilong palmen mas paitim tok na olgeta memba bai tok aut na sapos ol i no vot long kamapim senis em bai respektim rait bilong ol.

Sampela toktok kamaut namel long ol gavman minister na tu gavman bekbensa na midel bens memba tok ol ino amamas long gavman i no givim ol DSIP na PSIP mani long mekim wok na tok ol bai no inap sapatim tasol bikpela lukluk long ron bilong palamen em olsem em bil bilong praim minista na ol bai votim dispela senis.

IRC ripotim bikpela takis mani

Stanley Nondol i raitim

MINISTA bilong Tresari Don Polye long aste tebolim 3pela yia ripot bilong takis mani we Intenel Revenu Komisn o IRC kolektim insait long kantri na givim long gavman long mekim baste bilong PNG.

Long dispela ripot i soim long yia 2010, IRC kolektim K5.53 bilian na Minista Polye tok dispela em go antap moa long K669 bilian na winim mak we gavman putim.

Minista Polye tok dispela bikpela bilian wina mani kam long GST takis o takis ol kastoma peim tai mol baim samting olsem stao samting na peim long ol sevis na direct takis bilong ol wok manmeri

long pe bilong ol.

Long wankain yia IRC bin peim bek takis mani go bek long ol takis peia long mani mak long K476.6 bilian. Dispela em long GST takis na inkam takis we IRC peim bek long kampani na wanwan man meri.

Long 2011 IRC i kolektim total takis moa long K6.7 bilian. IRC lukluk long kolektim K6.2 bilian tasol bin go moa long baset em bin lukluk long en.

Dispela i soim olsem IRC bin daunim kos bilong operesen olsem pei bilong wok man na ol arapela kos kamap long wok administrese.

Na long 2012 lukim IRC bin lukluk long mekim K7.1 bilian tasol wantaim kam daun bi-

long prais bilong komoditis long wol maket bin suruk kam daun long K6.8nilain.

Tresari minister Don Polye tok bikpela tenkyu long IRC long kamapim bikpela mani long sapatim baset bilong gavman. Mista Polye tok IRC bin mekim bikpela mani long taim we komoditi paris long wol maket kam daun na ol arapela hevi bilong mani long wol na akantri.

Ripot I tok IRC gat bikpela nid long improvim wok bilong em long kisim moa win mani bilong kantri.

Ripot tok dispela bikpela mani kamap long hat wok bilong ol wokman bilong IRC we ol wok aninit long kominsina Betty Palaso.

Namel long ol bikpela nid

IRC nau gat long lukluk long stretim long kampim gutpela wok long kolektim takis mani long bisnis na pablik na long ikam em long;

-Apim skil bilong wokman long mekim gut wok

-Stretim komyunikesen infrastraksa namel long het opis na long wanwan provins

-Luksave long pe bilong wokman na ol arapela wari bilong ol

-Nidim gutpela loa long bainis na mekim isi rot bilong kisim takis mani

Long olgeta yia baset bilong gavman IRC save putim hap na ol arapela aid na gren save kamapim hap long gavman mekim baset na ronim kantri.

Ambullua laikim yet bel isi na gutpela sindaun kaunsela

Aaron Gunbi i raitim

RON bilong Lokel Level Gavman (LLG) kaunsel bai kamap olsem: ol kaunsila bai kamapim wanpela bodi long wanwan LLG na presiden bai kamap olsem siaman bilong dispela bodi o LLG long roning ol afeas bilong dispela LLG.

Na ol presiden bilong wanwan LLG bai i fomim provinse asembli we gavana bilong provins bai i siaman bilong provinse asembli.

Wanpela bilong ol dispela kaunsel presiden i gat sans long kisim sia bilong deputi gavana bilong provins we provinse asembli bai i votim.

Ol memba bilong provinse asembli em olgeta ilektet memba bilong palamen, olgeta presiden bilong ol LLG insait long provins, gavana bilong provins na sampela memba moa we dispela provinse asembli i makim ol long inapim nid bilong provins olsem Ogenik Loa long LLG na provinse gavman i toktok long em.

Planti bilong ol kendidet bi-

long kaunsila na presiden bilong ol LLG insait long Jiwaka Provins i kempen long inapim polisi bilong gavman long wok klostu wantaim provinse gavman long bringim sevis na developmen long komyuniti na distrik bilong ol.

Planti kendidet i sanap na husat i win bai i gat bikpela sans long mekim ol polisi na karim aut dispela polisi, na planti polisi bai sut long wok developmen em planti i toktok long infrastraksa developmen olsem rot na bris.

Tasol ol lain Ambullua long Apa Jimi long Jiwaka i bilip strong olsem olgeta wok developmen bilong kantri i hangamap antap long strongpela lidasip bilong wanpela man o meri i luksave long loa na oda, bel isi na gutpela sindaun long komyuniti, na rait bilong wanwan long makim lida bilong ol o demokrasi.

Olsem na ol Ambullua i holim pasim yet lidaman bilong ol em Kaunsela Robert Kumbako Tumun husat i save toktok strong tru long bel isi na gutpela sindaun long komyuniti, na rait bilong wan-

wan long makim lida we nogat wanpela i ken pasim.

Kaunsela Robert i bin holim dispela sia long 15-pela yia i go pinis na ol Ambullua i laikim em long stap narapela 5 yia gen long Apa Jimi long Kol LLG.

Dispela i kamap taim nominesen i pas long Jun 14, 2013 long Sen Angelin Peris long Banz taim nogat wanpela man o meri bilong 1,200 eligibel vota long Kunmol i nominet agensim Kaunsela Robert.

Ekting ritening opisa, Bill Danga i tok aut olsem Kaunsela Robert Kumbako Tumun em kansela bilong Kunmol Kaunsel Wod.

Kaunsela Robert i tokim Wantok Niuspepa olsem ol pipel bilong Ambullua i oltaim save laikim bel isi na gutpela sindaun.

"Mi save oltaim toktok strong na tok stret olsem dispela velyu ol pipel i gat long komyuniti em mipela i mas respektim.

"Na taim bilong ileksen, nesenel o local, ol pipel i mas stap fri long vot na makim lida

bilong ol em ol yet i laikim," Kaunsela Robert i tok.

Em i tok tu olsem i bin i gat liklik kros i kamap long ol sapota bilong em long ol narapela kendidet long taim em i ron long ileksen, tasol em oltaim save stopim ol na stiaim ol sapota bilong em long larim ol pipel i mekim disisen na makim lida bilong ol.

Bill Kina em komyuniti lidaman bilong Kondelka long Ambullua i tok, "Mipela i bin holim planti miting long komyuniti pinis na pasim tok long noken sanap agesim Kaunsela Robert bikos em man bilong kamapim bel isi long komyuniti.

"I no gat opis bilong polis i stap long Apa Jimi na tu, nogat ol bikpela kot i stap long Jimi long stretim ol hevi na wari bilong komyuniti olsem na pasin bilong bel isi i save bringim gutpela sindaun bilong komyuniti i hangamap antap long gutpela lidasip.

Ol arapela wok developmen i hangamap long dispela tingting.

Tasol gutpela lidasip bai kamapim dispela na mipela i gat bilip long lidasip bilong Kumbake," Bill i tokim *Wantok Niuspepa*.

"HAPPY 23rd BIRTHDAY to 'Miss EDITH KAWACWE BUSENG' '13.07.2013'



LOVE FROM MUM of WANTOK, Big Bro Benny of The National, Awac Nathan & sister Yaom Of POM.
Your best friend...JayTee of POM Gen, Unty Emmee & Felicity, in SI.
Dad in Hgn, rels in Aluki..Lae, Kamah..GKA,
Thank God for you and May He continue to bless you in the years ahead!



ASBISOP I KAM: Kaunsela Robert na pipel i welkamim Asbisop Douglas Young SVD bilong Hagen Katolik Asdaiosis. **Poto: Aaron Gunbi**

Liklik China long Basamuk

Sapos yu nupela man o meri long Basamuk Rifaineri bilong Ramu NiCo, bai yu guria long lukim planti kain kain masin i muv i go kam.

Planti long ol dispela samting em yu no inap lukim long arapela hap bilong PNG. Wapela long ol em ol bikpela bas ol i kolim 'Yu-tong' we i save karim ol wokman i

go long wok. I gat wapela bas we insait bilong en i olsem balus stret na dispela i save welkam long ol nupela lain i go long Basamuk Rifaineri na tu bringim ol wokman i go long bris na kisim ol taim ol wokman i go long Madang na kambek. Ol draiva bilong ol dispela bas tu em ol stail mangi tu.

Draiva bilong dispela waitpela

eksekutiv 'satel bas' long Basamuk em wapela 'teik' bilong Karkar ailan yet nem bilong em Balim Greg.

Long poto em i sanap long lephan wantaim tupela arapela wanwok bilong em Barok Goge na Peter Yaring.

Poto na stori: JAMES KILA



DWU sumatin tok strong egens Korapsen

Ol sumatin long DWU ino long taim i go pinis i wok-about na toktok strong long aweanes long paitim korapsen o paol-pasin long PNG. Planti pipel nau long PNG i tok ol i amamas long Praim Minista, Peter O'Neil i kamapim planti gutpela tingting long stopim korapsen na

tu putim banis long ol lida na ol Seketeri bilong ol Gavman Dipatmen long noken yusim nating pablik mani long laik bilong ol yet na amamas na ino lukluk long bringim sevis i go long ol liklik manmeri long rurel ples long PNG.

Poto na stori: JAMES KILA



OTML reksyu tim i sevim man

IMEJENSI Reksyu Tim (ERT bilong Ok Tedi Maining kampani (OTML) i bin karimaut Imejensi operesen na sevim wapela man i bin kisim birua long narapeal sait bilong Menga Wara, Westen provins long las wik Mande.

Man ya i bilong ples Migal-sim na em bin wok long gaden wantaim ol lain bilong em taim em i katim leg bilong em wantaim naip.

Ol wokman bilong OTML i wok long Ok Menga Wara we hairdo pawa stesen bilong kampani i stap long en i bin ringim ol lain long Kampani Sekyuriti Beis 1 long Tabubil taim wapela hauslain bilong man i kisim birua i ringim ol na toksave long birua i kamap, na em i laikim helpim.

ERT i bin muv hariap long belotaim stret long sevim man i stap long birua.

Bikos em bin hat liklik long helpim man ya taim Ok Menga Riva i tait, ol bin ringim Ek-

sekyutiv Menesa bilong Aset Proteksen Dipatmen, Trevor Green long helpim ol, na em bin salim wapela balus we OTML i bin haiarim long mekim sampela wok long Olsobip long not is Tabubil na em i wok long go bek.

Helikopta pailot em i wapela saveman stret na em bin stiaim gut helikopta na em i go daun long Ok Menga sait bilong wara we ERT tim i bung na kisim ERT memba, Diskson Kiteng i go long narapela sait bilong wara na sevim man i stap long hevi.

Ol bin kisim man ya i go Ok Menga Intek eria na tupela medikel opisa i givim em fes ad pastaim na bihain ol bin kisim em hariap i go long Tabubil Haus sik.

Birua ya i kamap long wankain hap we long las mun, wapela mama na liklik pikinini bilong em i gat tupela krismas i bin bungim hevi long en, na ol lain bilong ERT tim i sevim ol.

wantok moni

Send money to Anyone, Anytime Anywhere



Have you received Wantok Moni?

1 To Accept Wantok Moni

1. Dial *131#
2. If you are a new user, you will be asked to create and enter a 4-digit Personal Identification Number (PIN)
3. If you're an existing user, you will be asked to enter your 4-digit PIN (this is different from the SEND CODE)
4. Reply 1 to "Accept Wantok Moni"
5. Enter the Sender's SEND CODE plus the SEND CODE that you generated

2 To generate a Wantok Moni Withdrawal Code

1. Dial *131#
2. Enter your 4-digit PIN
3. Reply 2 to "Withdraw Wantok Moni"
4. Reply 1 to "Generate Code"
5. You will receive a response containing your WITHDRAWAL CODE



Anyone, Anytime, Anywhere!



320 1212 / 7030 1212



servicebsp@bsp.com.pg



www.bsp.com.pg



Official Sponsor of the 2015 Pacific Games

TELE Apdeit

FRI INTANET KONEKSEN

Oi Telikom kastoma i gat telepon lain i go long ol haus bilong ol nau I gat gupela sans long sainap long kisim fri intanet koneksen long telepon lain bilong ol.

- **Telefonintanet I gat;**
- Spit bilong em inap long 2Mbps
- WiFiling konektim planti lain i yusim ol komputa na ol smat fon
- Em i trupela intanet sevis bilong PNG

- **Sainim na kisim nau, nogut yu misaut**
- FRI Lokal Vois Kol inap long 1 mun
- Baim Top Ap na yu ken kisim Inap long 200 pesen bonas
- Isi long setap/ i no longpela taim long setap

Winim trip long lukim Mansesta Yunaited.
Kamap wanpela laki wina long kisim trip long go lukim Mansesta Yunaited i kisim A-Lig Oi Sta long ANZ Stediu, Sidni long mun Julai.

- Oi Prais i stap olsem**
- Wanpela Gem Pas
 - Wanpela balus tiket bilong go na kam
 - 2 nait akomadesen
 - Poket mani bilong wokabaut

Bai yu Win olsem
Yusim K200 long baim wanpela o moa Telikom Prodak long ol Telikom Stua, raitim nem na adres bilong yu long baksait bilong stua risit, na tromoi i go long wanpela bokis insait long ol Telikom Stua na bai yu go insait long dro.

19t/MB
Hamamas wantaim 19 toea pripei long daun taim intanet ret long 7 kilok moning go 7 kilok nait na nogat stop long namel.
Yu laik save moa, ringim 24/7 Kastoma Ke long telefon 3456789.



Pikinini bilong sinia polisman long Madang stil long benk

POLIS long Madang i holim pas pikinini bilong wanpela wan wok bilong ol yet husat i bin stilim bikpela mani na ronawe klostu long BSP Beng long Madang.
Dispela stil i bin kamap long las wik Fraide taim wanpela wok meri i laik go bringim mani long bek taim sampela ol yangpela man i karim gan i kam holim em na kisim mani na ronawe. Namel long ol dispela grup

man em pikinini bilong sinia polisman bilong Madang.
Oi dispela raskol lain i ronawe long lek bihain long ol i stil na i go kalap long wanpela moto bot I wetim ol i stap na go olsem long Siar viles, na bihain ol i kisim wanpela waitpela Fift element kar na go bek olsem long taun wantaim mani.
Madang Provinsal Polis Komanda, Suprintenden Sylvester Kalaut i tok ol

polisman bilong em i hariap tru banisim na holim tupela long ol dispela lain, we wanpela long ol em pikinini bilong sinia polisman long Madang.
Suprintenden Kalaut i tok dispela tupela stilman husat nau i stap long Jomba polis sel em Keku Maub, husat i gat 22 krismas em hap Raikos na Siar na pikinini bilong polisman em Elua Eddie Sibolo, husat i gat 24 krismas na

em hap Noten provins na Is Nu Briten.
Mista Kalaut i tok i gat bilip olsem Eddie Sibolo bai i gat narapela sas tu long narapela stil pasin we i bin kamap long las yia long Papingo long Madang.
Polis i sasim ol aninit long seksin 386 blong Kriminal Kod Ekt.
Em i tok tu olsem polis bai mekim wok painimaut yet long kisim arapela tupela lain husat i ronawe na

hait i stap na em i bilip dispela stil pasin em ol lain i plen wantaim ol lain insait long wok na mekim.
Mista Kalaut i tok tu olsem nau yet Madang wok long lukim bikpela stil pasin long ol bisnis haus i wok long kamap long taun, olsem na ol bisnis haus husat i laik bringim mani long benk i mas yusim polis lain long givim sekuriti taim em i karim bikpela mani long go benkim.

Musikman Demas Saul resis long Madang taun meya

WANPELA strongpela musikman bilong Madang, Demas Saul em wanpela long ol kenidet husat i resis long Madang lokal level gavman ileksen long sit bilong Madang taun meya.
Demas em wanpela long 38-pela kenidet husat i putim han long resis bilong taun meya we em i stap long Madang eben LLG presiden ileksen bilong 2013.
Vot bai stat tude (Fonde, Julai 11) na planti lain insait long ol eben wod long Madang bai sanap na

makim vot bilong ol bihain Limited Preferensen Voting (LPV) Voting sistem.
Demas, husat em bilong Yabob viles em i save kamaut wantaim planti naispela musik bilong Madang long promotim laipstail bilong Madang.
Nau yet Demas i putim planti ol posta bilong em wantaim wanpela bikpela sain long laplap we i hangamap long rot klostu long Modilon haus sik na arapela em i stap long Madang taun arere long

Bates oval.
I gat ol arapela kenidet tu i resis long dispela meya sia olsem foma meya yet, Mike Kamo, bisnis man Shane Rogers, Stanley Gan, Christopher Walames, pastor John Patrick, Saun Dambui, Peter Morgan (Bomai) na ol arapela.
Demas i yusim wanpela het-tok long musik album bilong em "Pasin Barata" long promotim kempain bilong em.
Stat long las wiken i kam, planti ol LLG kenidet i ron

long kar na mekim ol kempain bilong ol long ol strit long Madang taun.
Planti bilong ol i toktok long senis i mas kamap long sevis i mas go daun long helpim ol manmeri long Madang.
Wanpela kenidet, Christopher Walames i tokaut olsem planti ol sevises insait long Madang taun i pun-daun na em i sanap bikos olsem wanpela mangi Madang stret, em i laik stre-tim ol pablik sevis na bringim senis insait long



Madang taun, Musikman bilong Madang, Demas Saul i resis long Madang taun meya

Madang LLG ileksen bai stat tude

LOKAL level gavman (LLG) kaunsil ileksen long Madang provins bai stat tude (Fonde, Julai 11) na planti lain bai sanap long ileksen eria long givim vot bilong ol.
Planti wok redi i kamap pinis na tu ol kenidets i stat pinis long mekim ol kempain bilong ol long ol eria ol bai resis long en.
Madang provinsal edministresin long las wik Fonde i bin givim K700,000 i go long


Madang provinsal elektro-ral ofis long helpim ol long karimaut aut 2013 lokal level gavman ileksen long provins.
Long mekim olgeta dispela samting i kamap, Madang provinsal edministreta, Ben Lange na Madang Ileksen Menesa, Cyril Retaw i bin sainim wanpela memorandum ov andastending (MOU).
Dispela helpim bilong Madang edministresin bai helpim PNG Ilektrol

Komisin long Madang, we Mista Retaw i go pas long en long karimaut gut LLG ileksen bihain gupela pasin na seif.
Dispela helpim bilong edministresin i helpim tu mani PNGEC i givim long Madang em K2.2 milien na apim mani-mak i go antap olsem K2.7 milien long ronim LLG ileksen insait long 6-pela distrik long provins. Bikpela hap bilong dispela baset bai go long helpim wok bilong bringim

ol lain opisa long ronim ileksen na tu long sait long sekuriti.
Ol 6-pela distrik em Madang, Sumkar, Bogia, Midel-Ramu, Usino-Bundi na Raikos.
Mista Retaw long taim em sainim MOU i tok bikpela tenkyu i go long Madang provinsal edministresin, na i tokaut olsem opis bilong em i bin plen pastaim long kisim baset olsem K3.6 milien i kam long gavman, tasol dispela

i no kamap bikos ol i katim daun inap tasol long mak.
Mista Lange i tok Madang provinsal edministresin i bin makm long givim K800,000 long sapotim 2013 LLG ileksen, tasol provinsal treseri opis long Madang i givim K700,000.
Em i tok dispela helpim em wankain tasol em ol arapela provins long kantri tu i mekim long sapotim LLG kaunsol ileksen long provins bilong ol.

Oi mama strong long painim long-maus pis



OL MAMA husat i save stap long Madang i gat stail tu ya long tromoi sting na pulim pis long morning taim tru long Madang taun. Poto i soim sampela mama husat i save stap long Kalibobo na ol strit long taun i go sindaun arere long Memorial Lutheran Sios long Madang na mekim-save long tromoi string long pulim ol long-maus pis arere tasol long nambis. Ol i mekim dispela long pablik na planti lain i lukluk long ol i tromoi string long solwara tasol ol mama ya i no bisi. Ol sampela pikinini tu i joinim ol long tromoi string long solwara. Planti ol turis i mangalim kain stail bilong ol mama na wantaim pangal string bilong ol na kisim foto bilong ol tu. **Piksa na story: JAMES KILA**

Madang LLG ileksen bai stat tude

LOKAL level gavman (LLG) kaunsil ileksen long Madang provins bai stat tude (Fonde, Julai 11) na planti lain bai sanap long ileksen eria long givim vot bilong ol.

Planti wok redi i kamap pinis na tu ol kendidet i stat pinis long mekim ol kempein bilong ol long ol eria ol bai resis long en.

Madang provinsal edministresin long las wik Fonde i bin givim K700,000 i go long Madang provinsal ilektoral ofis long helpim ol long karimaut aut 2013 lokal level gavman ileksen long provins.

Long mekim olgeta dispela samting i kamap, Madang provinsal edministreta, Ben Lange na Madang Ileksen Menesa, Cyril Retaw i bin

sainim wanpela memorandum ov andastendeing (MOU).

Dispela helpim bilong Madang edministresin bai helpim PNG Ilektrik Komisin long Madang, we Mista Retaw i go pas long en long karimaut gut LLG ileksen bihain gutpela pasin na seif.

Dispela helpim bilong edministresin i helpim tu mani PNGEC i givim long Madang em K2.2 milien na apim manimak i go antap olsem K2.7 milien long ronim LLG ileksen insait long 6-pela distrik long provins. Bikpela hap bilong dispela baset bai go long helpim wok bilong bringim ol lain opisa long ronim ileksen na tu long sait long sekuriti.

Ol 6-pela distrik em Madang, Sumkar, Bogia, Midel-Ramu, Usino-Bundi na

Raikos.

Mista Retaw long taim em sainim MOU i tok bikpela tenkyu i go long Madang provinsal edministresin, na i tokaut olsem opis bilong em i bin plen pastaim long kisim baset olsem K3.6 milien i kam long gavman, tasol dispela i no kamap bikos ol i katim daun inap tasol long mak.

Mista Lange i tok Madang provinsal edministresin i bin makm long givim K800,000 long sapotim 2013 LLG ileksen, tasol provinsal treseri opis long Madang i givim K700,000.

Em i tok dispela helpim em wankain tasol em ol arapela provins long kantri tu i mekim long sapotim LLG kaunsol ileksen long provins bilong ol.



PM kamap long SME samit long Madang wantaim ol delegesin bilong em. Long sait em Gavana bilong Madang Jim Kas na Richard Maru, Minista bilong Tred na Indsatri. Foto: Neville Choi

Planti meri kendidet nominet long resis long EHP

Sape Metta i raitim

BIKPELA nesenel ileksen i kam na i go pinis long 2012, na nau em i taim bilong Lokel Levul Gavman (LLG) ileksen. Na planti ol kendidet long 21 provins insait long PNG i redim ol yet nau long resis long kisim sia bilong ol kaunsel na kaunsel presiden.

Na Isten Hailans em i wanpela long ol provins we provinsal ilektoral opis i kisim pinis nominesen

bilong 3,374 kendidet. Long dispela namba bilong ol kendidet – 106 em ol meri kendidet.

Etpela ten o (80) bai resis agensim 2,441 man kendidet long ol sia bilong kaunsel na tupela ten siks o 26 bai salensim 801 man kaunsel presiden kendidet long provins.

Namba bilong ol kendidet em bikpela long wanem provins i gat etpela distrik em Goroka, Kainantu, Unggai/Bena, Henganoi, Lufa, Okapa, Obura/Wonenara na

Daulo. Na population o memba bilong ol man-meri long dispela etpela distrik em moa long siks handret tausen (600,000) husat bai kamap long tromoi vot long taim bilong ileksen.

Nau yet wanpela mama grup lida long Goroka – Isten Hailans i no amamas long lukim olsem bikpela namba bilong kendidet bai resis long sit bilong meya long Goroka.

Mopalo Merifa i tokim *Wantok* Nius olsem, taim em i lukluk long

pes na namba bilong ol kendidet em i no amamas, long wanem, planti long ol em ol bikhet na spak lain husat i save sindaun na raun nating long ol strit long Goroka.

Em i tok olsem wanpela lidameri em i laik kamapim awenes na tok aut long ol man-meri olsem, bipo long ol i go tromoi vot long makim ol lidaman na meri bilong ol, ol i mas tingting gut long wanem, dispela mak ol i putim bai i ken givim pawa long gutpela man-meri, o

bikhet na spakman-meri.

Em i tok "tru olsem yumi wanwan i gat fridom long sanap na resis long kamap olsem ol lidaman-meri, tasol we i stap save bilong yumi? ol bikhet na spakman-meri tu i laik sanap na resis. Na sapos yumi makim ol kain lain, tru tumas yumi i no nap mu vi go fowot long kisim sevis na developmen.

Na bai yumi i ken i stap wankain olsem ol turangu lain long narapela faiv yias."

Mama lida askim pablik long tingting gut na vot

Sape Metta i raitim

KAINKAIN face i kamap pinis long ol posta we ol i putim apil long Goroka taun na planti ol pablik ples long Isten Hailans. Na dispela ol posta i soim ol kainkain man na ol meri tu bai sanap na resis long LLG kaunsol na presiden ileksen.

Dispela ileksen i no gat gutpela taiming bilong en, long wanem, taim bilong em i wok long surik yet.

Tru olsem dispela ol man-meri i gat rait na fridom bilong ol long resis, tasol luk olsem, planti long ol i no gat gutpela save long kamap olsem ol lida na mekim ol lidasip wok tu.

Dispela em sampela strongpela toktok wanpela lida meri, em mama Anna Kehuwo i mekim bikos em i luksave olsem ol kendidet i sanap nating – nating long kisim pawa, biknem na paulim tasol ol mani na kago samting bilong ol pipol.

Em i tok namba bilong ol kendidet husat bai resis long dispela ileksen em i go antap tru, na ol vota bai paul long husat tru bai ol i makim long taim ol i go long poling o tromoi vot.

Kehuwo i tok ol vota bai paul, olsem na ol i mas tingting gut na tromoi vot. Na mak ol i putim long vot, em i ken givim pawa long ol man-meri husat bai i ken kamap lida bilong ol long 5 yias.

Em i apil long ol vota olsem, sapos ol i laikim gutpela lida husat bai i ken wok hat na bringim guds, sevis na developmen i go daun long ol, ol i mas tingting, glasim na skelim gut na putim mak bilong ol. Bikos long dispela mak tasol – mendet na pawa bai i ken kamap.

Taim bilong ol pipol bilong Isten Hailans long i go long poling o tromoi vot long ilektim ol LLG lida bilong ol em bai stat long Mande 15th Julai, 2013.

AGRICULTURE TRACTORS

- Slashers
- Disc Ploughs
- Disc Harrows
- Post Hole Augers
- And Other Attachments for Farming

AGMARK MACHINERY

PORT MORESBY: 323 5572 | LAE: 472 6324 | KOKOPO: 982 8748
machinery@agmark.com.pg

BEYOND BOUNDARIES SUNDAY, 6PM - 6.30PM

Topic of the week:

Rebuilding the Police Force



FM100

PNC's Information & Music Leader

Text 1610

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Plastik fri taun

...Tabubil
i soim rot

Veronica Hatutasi i raitim

PLASTIK bek em i wanpela bikpela as long ol siti, taun, ol ples na environmen long Papua Niugini i deti na bungim hevi long en bikos long pipia em i kamapim.

Yumi lukluk long olgeta pablik ples, ol haus dua na ausait bilong ol bikpela supamaketa, ol liklik na bikpela stua, ol ples kaikai, ol haus sik, skul, ol opis na ol ples we ol haus slip bilong yumi i stap long ol, ol plastik pipia i pulap na plai nabaut i stap.

PNG bai mekim wanem long stopim plastik i bagarapim ples na environmen?

Em bai kisim strongpela tingting na sapot bilong ol politisen long mekim disisen long stopim baim ol plastik long ausait, na long ol stoa i yusim long putim ol kaikai bilong ol kastoma i wokim soping bilong ol.

I bin gat sampela toktok sampela yia i go pinis long putim tambu o stopim PNG long yusim ol plastik bek long ol stoa, na yusim ol bilum na ol grinpela "environmen frenli" bek long ol kastoma i ken yusim long putim ol samting ol i baim long ol stoa.

I kam inap nau, nogat toktok moa i kamap long dispela.

Tasol i gat wanpela taun long PNG we i no yusim ol plastik long ol stoa na maket insait long taun eria bilong em.

Dispela em Tabubil Taun em maining taun bilong Ok Tedi Maining Kampani Limitet (OTML) antap long Star Maunten, Westen Provins.

Populesen bilong dispela maining taun na ol ples i stap arere long en i namel long 10,000 na 15,000 pipel.

OTML i operet long samting olsem 40 krismas nau na Tabubil Taun i stap long wankain namba bilong ol yia.

Em i samting olsem 5-pela krismas taim ol atoriti long Tabubil i putim tambu long ol stoa insait long taun i noken yusim ol plastik soping bek.

Olsem nan au yu go long Tabubil Taun, yu lukim ples i klinpela tru na nogat pipia bilong plastik bek o ol narapela kain pipia.

Wantok i bin kisim toktok long sampela lain bilong Tabubil Taun long Tabubil nogat plastik na i no yusim taun we i kontribuit long mekim dispela taun i klinpela, naispela na seif ples long stap long en.

"Pastaim long stopim pipel long noken yusim ol plastik bek long Tabubil Taun, ol lain bilong Envaironmen Seksen bilong OTML na haus sik na Tabubil Taun Atoriti i bin karimaut ol awenes long en.

"Wanpela long ol eria i bin kamaut strong long awenes em ol pipia we plastik i save kamapim long ples na environmen.

"Long kik statim nogat plastik kempen insait long Tabubil Taun, ol bin givim mipela ol fri grinpela environmen soping bek long yusim.



SOPING LONG SVS SUPAMAKET: Everlyn wantaim ol soping bilong em we kesia o wokmeri bilong stoa long kes aut kaunta i pulumapim insait long grinpela soping bek bilong em.



BIHAIN LONG SOPING: Angelyne na bebi Carlos i karim wanpela bek soping long grinpela bek na laik go insait long haus dua bilong ol long Namal Strit, Tabubil.



LAIKIM PLASTIK FRI TABUBIL: Cathy Putubu i no lukim wanpela hevi long stopim yusim ol plastik bek long stua we i save mekim ples i luk nogut wantaim ol pipia em i kamapim.

Ol Poto: Veronica Hatutasi

OL STRONGPELA OGENIK

BILUM: Sampela ol naispela bilum ol asples meri Tabubil i wokim long skin bilong drai tulip diwaina i hangamap i stap long salim long Tabubil Maket.

"Dispela ol bek ya em ol i salim long bikpela stoa hia em SVS Supamaketa long K3.50.

"Mipela i yusim dispela grinpela bek na bilum wantaim tu long ol stoa na maket.

"Faivpela krismas nau taim ol i stopim plastik bek long Tabubil na i nogat hevi long dispela.

"Mipela i amamas tasol olsem dispela i daunim pipia long olgeta hap bilong taun na ples i luknais, na environmen i klinpela.

"Mi amamas long stap long naispela, klinpela na seif ples olsem long Tabubil Taun," Cathy Putubu bilong Buin long Otonomes Rijen bilong Bogenvil(ARB) em i wanpela mama husat i stap wantaim famili bilong em long Tabubil Taun, i tok.

Man bilong em i wok long OTML



TAUN SENTA: Ai dua long hap bilong Tabubil Taun i gat long em komesel na bisnis senta, bikpela soping senta na maket eria.



Main Mil, na ol i stap long Tabubil long 16 krismas.

Cathy i tok bipo long ol bin stopim ol plastik bek long Tabubil, ol taun woklain i save hatwok long klinap long ol pipia plastik i plai long olgeta hap bilong pablik ples, ol stua na ol ples i gat ol haus slip long en.

"Mi bilip olsem sapos ol politisen na ol helt na taun atoriti i wok bung wantaim na strongim tingting long kamapim samting, em bai wok long olgeta hap bilong PNG olsem em i wok long Tabubil," Cathy i tok.

Wantok i bin bungim narapela mama i wokim soping bilong em insait long Tabubil SVS Supamaketa n a stori liklik wantaim em.

"Em i gutpela moa long yusim grinpela bek na bilum long putim

ol soping insait bikos em i seif.

"Tu, plastik i save wokim planti pipia tumas.

"Long 5-pela yia taim noken yusim ol plastik bek long soping i bin stat long Tabubil, mi amamas long tok olsem yu no nap lukim wanpela plastik pipia long taun na ples i kiln gut stret.

"Mi bilip wankain i ken kamap long ol narapela taun long kantri bilong yumi sapos ol atoriti na ol lida long olgeta level i wok bung wantaim," Everlyne Bernard em wanpela mama bilong Is Sepik tasol man bilong em i wok long OTML na ol i stap long Tabubil taun long 13 krismas, i tok.

Angelyne Lihai em wanpela yangpela meri bilong Siwai long ARB na em i stap wantaim famili bilong kasen susa bilong em i wok

wantaim OTML, i tok olsem:

"Mi kam long Tabubil las yia tasol na olgeta taim mipela i go soping o long maket, mipela i yusim ol grinpela environmen soping bek o bilum.

"Dispela i gutpela sret bikos em i seif na tu, nogat plastik pipia i pulap o plai nabaut long ol ples na narapela bikpela taun long kantri.

"I moabeta long mekim wankain long olgeta hap bilong kantri," Angelyne i tok.

Bai yumi tok wanem nau? Tabubil Taun i soim rot long noken yusim ol plastik bek long soping na maket na sapos em i ken mekim na kontrolim ol pipia we plastik i kamapim, ol narapela taun na siti long PNG i ken wokim tu.

Peace Foundation Melanesia trenim ol trena long Maprik

Paul Fuzo i raitim

PEACE Foundation Melanesia, wanpela non gavman oeniasesen (NGO) long kantri, nau i holim wanpela Rijenal trenim ol trena woksop long skul bilong Komyuniti Jastis long Maprik Distrik long Is Sepik provins.

Dispela woksop bai ron faivpela wik olgeta, we i lukim 28 manmeri i stap insait long em we i makim Wewak Distrik, Yangoru, Maprik, na Ambunti.

Trenim woksop ya i bin stat long Mande Julai 7, bihain long Progrem Menesa bilong Edukesen long Maprik, Rex Alimaka, i bin go pas long opim.

Insait long opim toktok bilong em, Mista Alimaka i tok loa na oda hevi em i hevi bilong olgeta long karim.

“Yumi noken larim ol polis tasol i wok hat long traim daunim.”

Em i tok em i amamas long lukim Maprik distrik i kamap olsem distrik we nau i holim dispela Momase Rijenal TOT Woksop bilong Faundesen.

Astingting bilong woksop em long skulim ol manmeri long kamap ol tisa long skulim ol pipel long pasin midiesen na restoretiv jastis.

Eksektiv Dairekta bilong Peace Faundesen Melanesia, James Laki, i tokaut tu long Wantok Niuspepa, long Wewak, olsem insait long dispela

faivpela wik trenim, ol lain sumatin bai kisim save long holim na ronim ol Komyuniti Jastis Kos insait long ol lokol level gavman eria, na tu, ol arapela provins insait long Momase Rijen.

Em i tok dispela kos i lukluk moa long ol yut, ol meri, ol LLG, na ol vilis kot, bilong wanem planti taim, ol dispela grup i save bungim hevi na i save stap insait long ol rot bilong stretim hevi.

Mista Laki i givim bikpela tok tenkyu makim maus bilong Peace Foundation Melanesia, i go long AusAID, aninit long progrem bilong Strongim Pipel Strongim Nesen, long givim mani long kamapim dispela woksop.

Tisa Sevings na Lons Sosaiti opim nupela sekyuriti bes



Sinia Tisa Menesmen wantaim tripela TISA Sekyuriti gat (long yunifom) sanap long fran bilong nupela Sekyuriti Bes long Gordons 5. Foto: TISA

Daru Hausik kisim nupela TB Wot

DARU hausik i kisim nupela TB Wot long helpim daunim sik TB insait long PNG, wantaim helpim bilong Australia gavman.

Wok bilong stopim sik TB insait long Papua Niugini i lukim bikpela senis long Julai 8 wantaim nupela wot bilong speselis tritmen bilong Daru Jeneral Haus sik, insait long Westen Provins.

Palimentari Sekreteri bilong Pasifik Ailan Afeas, Seneta, Honorable Matt Thistlethwaite, i bin opim dispela wot i gat 22-bed bilong TB na wot bilong putim ol lain i kisim strongpela sik TB, multi risisten TB or sik TB we i save bikhet long marasin. Mista Thistlethwaite i bin go wantaim PNG Minista bilong Helt na HIV, Hon Michael Malabag MP.

Dispela wot i gat 6-pela rum bilong ol lain i kisim multi risisten TB na 16-pela bet bilong ol lain i stap long TB marasin na i wok long kamap

orait.

Nupela wot i kos A\$33 milien, na em i hap bilong promis bilong Australia Gavman long helpim PNG mekim wok painim aut na luksave na tritimen TB insait long Westen Provins.

Seneta Thistlethwaite i tok, gutpela we bilong stopim drag resisten TB o TB i save bikhet long marasin, em long luksave hairap long en na putim sikman long marasin aninit long Wasman progrem (DOTS) long komyuniti bilong ol yet.

Lo bilong Wol Helt Ogenaisesen long DOTS o wasman progrem, em i save yusim ol helt volontia long stap wantaim ol sik lain long olgeta de na strongim ol long kisim marasin bina long ol i nap taim ol i pinisim.

“Dispela kain we em Australia i wanbel long sapatim na tu em i wok long sevim laip,” Seneta i tok.

“Ol ripot bilong Daru

Haus Sik i soim olsem namba bilong ol lain i dai long multi risisten TB o sik TB i save bikhet long marasin i bin go daun long 25 pesen i kam long 5 pesen namel long 2011 na 2012,” em i tok moa.

Helpim bilong Australia insait long Westen Provins i gat ol speselis woklain, trenim bilong ol komyuniti helt woka na volantia tritmen sapota, ol medikal ikwipmen, marasin, wanpela si ambulens, na fanding long kisim ol tes i go long laboratory long Queensland.

Dispela stail bilong Australia em i gutpela na pablik helt na TB ekspet wantaim Komonwelt Sif Medikal Opisa, Queensland Sif Helt Opisa na Wol Helt Ogenaisesen, na global atoriti bilong kontrolim TB.

Tasol Senator Thistlethwaite i lukim olsem dispela hevi i no stap tasol long Westen Provins.

TISA Sevings na Lons Sosaiti (TISA) i gat nupela Sekyuriti Bes bilong ol long Gordons 5, Nesanel Kapital Distrik.

Em i bin kos K870,000.00 long sanapim dispela haus bilong ol sekyuriti wokman bilong TISA bai yusim olsem opis bes na ol bai lukautim ol bilding na samting bilong TISA long Pot Mosbi na Lae.

Plen bilong wokim dispela sekyuriti bes haus, i bin stat long yia 2012 olsem wanpela bilong ol bikpela tingting bilong senisim lukluk bilong opis bilong ol.

Taim sekyuriti opis i muv, em bai kamapim moa spes long nau opis bilong TISA long Not Waigani TISA haus.

Tulait Limited i bin wokim akitekta disain na Gman Konstraksen i bin sanapim haus na projek i bin stat wantaim disain

long Septemba 2012, na i pinis wantaim haus long Julai 2012.

Long bikpela opening long Fraide Julai 5, Bot Siaman bilong TISA, Mista Gabriel Tai, i tok amamas na tenkim Akitetsa Kampani Tulait Limited na GMAN Konstraksen long gutpela wok tupela i mekim wantaim, long pinisim dispela projek insait long taim ol i makim. Em i tokaut tu olsem nau em i kisim win long lukim wanpela bilong ol plen bilong administresen bilong TISA i kamap tru.

“Long yupela ol kontrakta na olgeta lain husat i putim han long dispela projek, mi laik tok, yupela mekim nambawan wok long kamapim samting tru long plen yumi gat.

Mi bilip TISA SEKYURITI i wok long gro wantaim ol nupela rikrut na tu long pinisim

dispela projek em i wanpela step long stretpela rot,” Mista Tai i tok.

Em i tok moa olsem nambawan wok bilong TISA SEKYURITI em long was long olgeta properti bilong TISA na ol opis insait long Pot Mosbi na Lae.

Em i tok ol i bin statim dispela sekyuriti wok long 2010, na nau ol i gat 76 sekyuriti i wok pul taim, 54 long Pot Mosbi na 22 long Lae, na ol i laik kisim moa wokman yet long bihain.

Ol TISA Bot of Dairekta, TISA Menesmen na ol lain bilong Tulait Limited na GMAN Konstraksen i stap lukim dispela opening.

Ol kontrakta i tok tenkyu long TISA i givim ol sans olsem tupela nesanel kampani yet na ol i hop bihain taim bai TISA i ken givim ol moa kontrak long ol arapela prokek bilong ol.

NASFUND FM100 TALKBACK SHOW

MONDAY - FRIDAY, 9AM TO 12PM

Participate and be heard on an open forum on National Radio

FM100
PNC's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINUPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCO 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Paradais Hai skul strongim ol yangpela long pablik toktok

PNG Paradais Hai Skul i wanpela long ol skul insait long Nesanel Kapitel Distrik i wok long helpim ol yangpela pipel olsem ol sumatin long gat "confidence"konfidens o gat bilip long ol yet na i no sem o pret long autim tingting bilong ol long pablik.

Skul i save gat Anuel Spis (Speech) resis we olgeta skul insait lon g NCD i go insait long en.

Dispela em namba 6 yia Paradais Hai Skul i ranim resis na long dispela yia, 16-pela sumatin bilong sampela skul i bin go insait long em.

Wanpela sumatin bilong Sogeri Nesanel Hai Skul i bin winim nambawan prais, Paradais Hai Skul kisim namba tu, na Marianville i kisim namba tri prais.

Toktok bilong namba tu prais wina, Talytha Siraba i wokim Gret 10 long Paradais Hai Skul, i lukluk long vailens agensim ol meri long PNG, wanpela bikpela hevi kantri i gat na em i wok long traim hat long daunim.

Na em i gutpela olsem ol yangpela bilong yumi long skul i luksave long dispela hevi, na ol i ken mekim samting long helpim daunim na kamapim sampela gutpela samting long sosaiti bilong yumi.



WIN TOKTOK: Talytha i winim namba tu ples long toktok resis long Paradais Hai Skul, na i kisim prais. *Poto: Lorraine Siraba*

Talytha i bin wokim gutpela risets long Vailens Agensim ol Meri", het tok tu bilong toktok o spis bilong em em bin givim long dispela toktok resis.

Sampela long ol statistiks Talytha i givim we i beis long UN Wimen ripot, i tok PNG i wanpela long ol kantri long wol we vailens pasin bilong mekim nogut long ol meri i antap tumas, na skelim wantaim ol

narapela kantri long wol, em i kamap namba tu bihain tasol long Uganda.

"Tripela lon g 4-pela meri namel long 15 na 49 krismas i ekspirien-sim sampela kain vailens o bagarap- fisikel o seksual.

"Long sait bilong paitim nogut meri, 56 pesen lon g ol meri long PNG i bungim hevi long dispela, tasol dispela i no kaunim seksual

vaielns o rep (rape)," Talytha i tokaut long toktok bilong em.

Em i tok longpela taim ol pasin bilong bagarapim, paitim na mekim nogut long ol meri i kamap na ol atoriti long dispela kantri i no wokim tumas samting.

"Dispela i mekim na pipel i ting olsem dispela em i nomol we long laip. Bikos long dispela pasin bilong no mekim samitng, yumi wok long bungim bikpela hevi long kilim dai na repim ol meri," Talytha i tok.

Em i tok bikos long ol vailens ol meri i bungim, pret pasin i bikpela samting we i stopim ol meri long fridom long raun na go long wan em hap na mekim ol samting we ol i laikim long en.

"Yumi (ol meri) i save wokabout i go long stoa o maket wantaim pretpasin. Yumi mas lukluk baksait olgeta taim na holim gut ol bek o bilum bilong yumi. Laip bilong yumi ol meri em pret pasin i kontrolim yumi," Talytha i tok long resis tok-tok presentesen bilong em.

Em i tok taim yumi tok yumi gat kantri i gat ol naispela samting, pulap long ol neturel risos, trupela naispela samting em ol meri na ol mama we i hap bilong populesen bilong kantri na wokim wankain kontribusen long developmen bilong

kantri, tasol ol i bungim hevi na stap bikos long vailens ol i kisim long fisikel na "emotional" o long sait bilong piling.

Long toktok bilong em, Talytha i tok ol man i kam apim vailens agensim ol meri, na strongpela loa inap helpim, tasol em no nap rausim dispela pasin.

"Risets i soim olsem famili haus em nambawan ples we ol papa-mama i mas edresim long skulim ol pikinini taim ol i lukluk yet long pasin rispek, tok tru na ikwaliti. Ol pikinini man i lainim long ol papa bilong ol na sapos papa i wokim nogut long mama na susa, na i no menesim ol hevi long gutpela rot, bai yu lukim ol pikinini man i wokim wankain," toktok bilong Talytha i go olsem.

"Vailens agensim ol meri i no bihainim demokrasi, daunim groa bilong ikonomi, gutpela gavman na pis o gutpela sindaun long PNG. Em i go agensim Mama Loa bilong yumi na toktok ol man na meri wantaim i mas kontribut long ol wok developmen. Em (vailens) i noken hait baksait long ol pasin tumbuna na kalsa. Em i agensim loa na i rong olgeta," Talytha i kisim wanpela eksampel toktok bilong wanpela bikmeri, Jenny Hayward-Jones, i tok.

Westen Hailans na Jiwaka Provins bai lukim gutpela moa helt sevis

HELT sevis na moa yet, helt bilong ol mama na pikinini long tupela komyuniti long Westen Hailans na Jiwaka bai kamap gut bihainim ol nupela helt sab helt senta, ol nupela bilding bilong ol woklain na ambalens long Kuruk, Fatima, Mun na Rebiyamul.

Lon g las wik, Hau Komisina bilong Australia long PNG, Deborah Stokes i bin opim Maun Hagen Katolik Helt Sevis in frastaksa apgret insait long wanpela seremoni long Kuruk.

Aninit long PNG-Australia Insentiv fan, em bin kostim K5 milian long bildim tupela nupela helt sab senta na ol haus bilong ol wok manmeri long Kirik na Fatima, ol haus bilong ol wokman long Mun, nupela hap bilong ol sik manmeri long wet, ol nupela haus bilong ol woklain long Rebiyamul na wanpela nupela ambalens.

Mis Stokes i tok ol nupela bilding bai mekim moa spes na moa pipel i ken kisim sevis long ol eria olsem helt bilong ol mama na ol pikinini.

"PNG i gat bikpela nit long eria bilong helt. Wanpela long ol 13 pikinini i no save lukim namba 5 krismas bilong ol, na mak bilong ol mama i karim pikinin i na dai i antap moa long Esia Pasifik," Mis Stokes i tok.

"Ol dispela nupela fasiliti bai kamapim senis, wantaim Kuruk na Fatima helt senta bai givim ol mama na ol pikinini nupela materniti wod, klinik bilong ol bel mama na ol wokman i wok de na nait," Mis Stokes i tok.

Long las yia, Maun Hegen Katolik helt Sevis i bin sevim moa long 204,000 long autpesen, ol mama i bin karim 266 nupela bebi na moa long 39,000 i bin kisim banis sut.

Taim em i autim tok tenkyu long bikpela helpim bilong Australia, Katolik Helt Sekreteri long Westen Hailans, Sister Divya i tok ol nupela haus bilong ol haus sik woklain bai helpim ol woklain i wok gut na sevim pipel long de na nait bikos ol bai stap klostu tasol long wokples hap.

Ol DWU sumatin tingim Bruder Simpson

OL SUMATIN bilong Divain Wod Yunivesiti (DWU) i bin wokim wanpela memoriel bung long las Sande nait long tingim Vais Presiden bilong Studen Afeas, nau i dai, Bruder Andrew Simpson sfs MBE husat i bin dai long Jun 12, 2013.

Ol sumatin i bin stap long skul malolo bilong ol na nau ol i go bek long skul, ol i sori na tingim em na ol bin bung long mein oditorium insait long kempus long givim luksave long tisa, edministreta

na pren bilong ol.

Ol sumatin i bin laitim ol kendel we Saplen bilong ol, Pater Giorgio Licini PIME, i bin blesim, na bung long yunivesiti memoriel pak pastaim ol i wokim ol toktok, na ol grup i bruk long ol wan wan rijen na kamapim ol singsing na danis.

Presiden bilong Studen Representativ Kaunsel (SRC), Philip Bosuk, i bin tok memori bilong Bruder Simpson bai stap longpela taim na ol lain i kam bihain bai lukim

na benefit long ol han mak bilong em we em i gat long laip bilong planti pipel bilong dispela kantri.

Bruder Simpson i bin kam long PNG long yia 1987 taim em i gat 39 krismas na wok long planti Katolik tisa trening kolis olsem long Sen Pauls Yunakanau, Is Nu Briten, Sen Benedict Kaindi, Is Sepik na Kristen Brudar long Goroka bipo em i go long DWU long 2003.

Sampela sumatin i bin tokaut long gutpela stiatok na

pasin bilong luksave long hevi taim ol i no peim hariap ol skul fi.

Ol Solomon Ailan sumatin i bin autim tok tenkyu long Bruder Simpson long givim gutpela helpim na ol i go long DWU long wokim teseri skul bilong ol lon g hap.

Nau vais Presiden long DWU Studen Afeas, Ted Alu i tok Bruder Simpson em i wanpela gif o presen long famili bilong em i kam long PNG.

Tiata grup bilong Gudinaf long fan resing wok

Veronica Hatutasi i raitim

WANPELA tiata grup bilong ples Mataita, Gudinaf (Goodenough) Ailan long Milen Be Provins i stap nau long Mosbi siti long wokim fan resing bilong helpim praimer skul long ples bilong ol i sanapim klasrum na haus tisa.

Awalava Tiata Grup (ATG) i gat long em 25 memba na 5-pela long ol em ol meri, i stap nau long Mosbi na putim kamap pilai bilong ol long Ulie Bier Tiata long Yunivesiti bilong PNG (UPNG) long Waigani kempus, Mosbi. Mani ol i kamapim bai go long bildim wanpela klasrum na wanpela haus tisa long Sen Paul's Praimeri skul long Gudinaf Ailan.

Pilai so bilon g ol bai ron long Ulie Bier Tiata long 4-pela de. Ol bin stat long aste Trinde Julai 10 na taim i namel long 7.30 pm na 9 pm, na bai pinis long Sarere, Julai 13.

Pe bilong lukim pilai i go olsem: long Trinde Julai 10 na Fraide Julai 13, em ol Gala Nait we ol bikpela manmeri i peim K50 get fi taim ol pikinini we krismas bi-

long ol i stap aninit long 12, na ol sumatin i peim K25.00


Fonde Julai 11 na Fraide Julai 12 em ol Palbik Nait we ol bikpela manmeri i peim K10.00 taim ol pikinini aninit long 12 krismas bai peim K5.00

Insait long wanpela wok wantaim ol nius manmeri, man i makim ol em Vincent Manukayasi i tok grup i bin kamap long Mosbi long strong bilong ol yet.

Em i tok ol bin lusim Gudinaf Ailan long motobot i go olsem long Rabaraba na long hap, ol i kisim trak na kam olsem long Kupiano, na las long em, i kam long Mosbi.

Fan resing wok bilong ol i kisim wanpela mun we ol i putim kamap pilai bilong ol ol i kolim long Kulele, man bilong pilaim musik na naispela musik i pulim meri i go long em. Nesanel Kaiserel Komisn (NCC) i bin donetim K3,000 long helpim fan resing bilong ol bikos em i lukim olsem as tingting long dispela wokabout bilong ol i gutpela lon g helpim komyuniti.

Liklik stori em Kulele i wanpela man i



save stap long bikples long Rabaraba eria bilong Milen Be, na pilaim kulele bilong em olgeta nait.

Musik i save go olgeta long ples OyaMadava long Gudinaf Ailan we wanpela sif i stap wantaim tupela pikinini meri bilong em.

Bikpela pikinini meri i laikim stret dispela musik na askim papa bilong em long go long bikples na painim ples we naispela musik i kam long en.

Nupela senta bai helpim gut ol meri Tari

OL meri long Tari, Hela Provins i gat as long amamas olsem ol bai gat ples bilong kisim trening, save na helpim long go hetim gut laip na sindaun bilong ol.

Dispela i kamap wantaim opening long nupela Wimen 's (o Meri) Senta long Tari tupela wik i go pinis.

As tingting we i bin strongim ol meri Tari long kamapim mani long sanapim senta em long kisim trening long ol eria we bai helpim ol long stap, sindaun na laip bilong ol na tu, long rentim wanpela hap bi-

long bilding long kisim mani bilong sapotim ol wok na progrem bilong ol.

Ol meri grup yet long Tari i bin wokim ol fan resing long kamapim mani bilong senta bilong ol, na PNG LNG Projek i bin sapotim ol long sanapim bilding.

Em i kisim tupela mun tasol long sanapim na pinisim dispela nupela risos senta bilong ol meri Tari.

Deputi Edministreta bilong Hela Provins, Kove Waiko na PNG LNG Projek Apstrim Fil Komyuniti Dvelopmen Sapot

Kodineta, Priscilla Pius, i bin go pas long opim nupela Meri Tari risos senta.

Risos senta bilding i gat tupela level.

Ol bai yusim ol rum long level 2 antap long rentim aut na mekim mani bilong ol meri long karimaut ol progrem na trening bilong ol.

Daubilo em ol bai yusim olsem trening eria long lainim ol nupela skil olsem beking, somap, helt na haijin, literesi na rilijes stadis.

Dispela trening eria i ken kisim 100 pipel long em.

Mis Pius i bin tok dispela trening na risos senta bilong ol meri em i gutpela piksa long komyuniti i wok bun g gut wantaim na luksave i go long ol meri na hatwok bilong ol we i lukim bilding i pinis insait long tupela mun tasol.

Em i tok komyuniti dvelopmen plen bilong ol em long sapotim ol komyuniti we i helpim ol yet.

Na long projek ya i go gut, ol manmeri long komyuniti.

Dispela meri komyuniti grup i gat moa long 700 memba long em.

Boana Distrik bai hostim 2014 ELC meri konprens

Sanang Zazing i raitim

SANDE Jun 30, 2013, i lukim ol pipel bilong Boana wantaim ol gavman na sios opisal wantaim ol arapela koporet bodi i bung na witnesim brukim graun seremoni bilong nesenel meri konprens Boana distrik bai hostim long Septemba, 2014.

Ol biknem lain olsem Morobe Gavana Honoreb ol Kelly Kasiga Naru, memba bilong Nawaeb Open, Gisuwat Siniwin wantaim ol sios na gavman opisa long nesenol na distrik i bung na witnesim.

Opisel brukim graun seremoni em

evanjelisim dairekta bilong ELCPNG, Reveren Binora Yunare, i go pas long lotu na opim.

Ol trampet grup na yut laip ben i singim PNG Nesenel Entem, "All Arise," i opim litujikol oda bilong selebresen i go insait long autim Tok bilong God.

Reveren Binora Yunare, taim em i autim Tok bilong God i bin sut long kirapim ol Kristen i sanap ples kli na tokaut long bilip bilong ol long Jisas Krai.

Reveren Yunare i kliam namba wan as tru bilong Kristen bilip em man i mas tokaut long em.

Em i soim olsem ol namba wan birua bilong ol Kristen em i no ol lain ol i kolim ol olsem Atheist, tasol, ol birua tru em ol lain ol i kolim ol yet olsem Syncretistic lain.



OPISEL MAK: Ol bikman bilong Luteran Sios wantaim Morobe Gavana, Kelly Naru na ol narapela bikman bilong sios na gavman i witnesim opisel brukim graun seremoni long makim stat bilong ol wok bilong Boana ELC/PNG Distrik konprens bilong ol meri neks yia. **Poto: Sanang Zazing**

bilong ol Kristen sios em long tokaut long Jisas Krai, olsem Aposel Pita i tokaut insait long Matyu 16:13-20," em i tok.

"Dispela graun o wol i putim ai long Jisas Krai em Pikinini tru bilong God, em God yet i bin salim em i kam. Long em tasol olgeta manmer bai kisim laip i stap gut oltaim long bilip bilong ol," Reveren Binora i tok.

Evanjelisim direkta i tok tu olsem luksave bilong ol Morobe pipel husat i bin kisim Tok bilong God ol namba wan lain misinari i bin karim i kam na autim long ol haiden manmeri, kaikai bilong dispela wok em nau yumi lukim Papua Niugini i sanap em yet olsem Kristen kantri.

Em i tok taim ol gavman lida bilong yumi i sapotim sios, em i soim olsem Morobe em i Kris-

ten provins husat i tokaut olsem Jisas Krai em i helpim tru bilong ol.

Reveren Binora i tok wok bung bilong gavman na sios em i no min long toktok long mani na kago, tasol em i bung long wok bilong Gutnius na soim bilip bilong ol pipel olsem, Morobe em i Kristen na na Luteran provins.

Em i tok, program bilong ol meri em i wanpela bilong divisen aninit long evanjelisim dipatmen na em i save lukluk na helpim sindaun bilong ol meri i stap patna bilong man insait long Evanselikal Luteran Sios bilong Papua Niugini.

Long dispela taim, Presiden bilong ELCPNG Boana distrik, Reveren Tauke Samale i luksave long bung bilong ol sios na Morobe gavman opisa long Boana long makim dispela

bikpela de bilong statim wok bilong ol meri long lukautim 2014 ELCPNG wokmeri konprens bai kamap long Boana distrik.

Reveren Tauke i tok dispela kain bung i save kamapim yuniti bilong ol pipel insait long sios na gavman long kamapim stretpela pasin na rot bilong bringim ol sevis ol pipel bilong Boana i no bin kisim longpela taim i go pinis.

Em i tok tenkyu na amamas tu long ol narapela sios grup i bung wantaim long sapotim wok bilong meri konprens i ken go het na kamap. Na dispela bai givim gutpela nem bilong ol Boana pipel na givim glori i go long Biknem bilong God insait long Boana eria.

Moa long 1,000 manmeri i bin bung na witnesim dispela bikpela de bilong ol meri insait long Boana distrik.



Yut, Meri na Femili

Pastor Barbara Lunge

Man i mas kaikai na bai stap laip

I GAT kaikai o nogat kaikai. Kaikai i bilong mekim wanem?

Kaikai em bilong givim yumi strong long mekim wok taim yumi stap laip. Man i save kaikai na dring wara long kisim strong bilong mekim wok; olsem na husat man i save stap nating na i no save mekim wok, em i nogat rait long kaikai. (Tok piksa i kam long wanpela raita, Jones Nayland.)

Kaikai em i bikpela samting long yumi man, wankain olsem wara, haus, win na fren long stap wantaim.

Sapos man i no kaikai longpela taim, em bai dai.

Taim wanpela man i kamap pikinini bilong God, na i kamap nupela gen long spirit, em i bai nidim kaikai bilong spirit em i kam long buk Baibel. Em bai kaikai Tok bilong God long strongim bodi long groa na long mekim wok bilong spirit.

Laip bilong man i gat tripela hap, bodi, sol na spirit man.

Baibel i tok, "Larim God bilong Bel isi i mekim yu kamap holi olgeta.

Larim olgeta spirit, sol na bodi bilong yu i stap gut na nogat sin inap long taim Jisas Krai i kam bek." 1 Tesalonia 5:23.

Bodi em i haus bilong spirit na sol. Na dispela hap bilong man i save nidim kaikai bilong em yet long strongim em long mekim wok bilong em.

Planti Kristen i save go bek gen long pasin bilong graun, bilong wanem ol i no save kaikai Tok bilong God na spirit man em hangre i go na i dai.

Sampela, spirit bilong ol i kamap bun nating; sampela nek bilong spirit i pas wantaim bikpela laik na tingting bilong samting bilong graun, biknem na namba, sampela i no moa laikim Jisas olsem pastaim, sampela i kamap Kristen long bodi tasol, na sampela i sanap long namel tasol, i no insait tumas na i no ausait tumas.

Ol i nogat strong long sanap daunim laik bilong bodi, bikos ol i no save kaikai gutpela kaikai bilong spirit long stap laip na strong long go longpela taim wantaim God.

Yumi lukim sampela tok tru insait long baibel, long wanem as yumi mas kisim kaikai bilong spirit long olgeta de.

Nau yumi stap long taim bilong kamapim gut kingdom bilong God.. "olsem liklik bebi, yu mas krai long dring susu bilong Tok bilong God, na yu bai groa." 1 Pita 2:2, "Mi yet mi bret bilong laip. Ol papa bilong yupela i kaikai mana long ples nating, tasol ol i dai pinis.

Tasol dispela em i bret i bin kam daun long heven na husat man i kaikai dispela bret bai em no inap dai.

Mi yet, dispela bret i kam daun long heven. Yes, dispela bret mi bai givim long wol em i bodi bilong mi yet.

Man husat i kaikai bodi bilong mi na dring long blut bilong mi, em bai gat laip oltaim, na mi bai kirapim em long las de.

Bodi bilong mi em i kaikai tru, na blut bilong mi em trupela dring. Husat man i kaikai bodi bilong mi and dring long blut bilong mi, bai i stap insait long mi, na mi bai stap insait long em." Jon 6: 48-51, 54-56.

Sapos yu bin stap olsem pikinini man long buk baibel husat i bin ranawe long papa bilong em, na i wok long kaikai long plet kaikai bilong pik, orait nau, BIKPELA GOD i wok long singautim yu long kam bek gen long haus bilong papa bilong yu.

I gat kainkain kaikai em God papa bilong yu i rereim bilong yu long kisim na amamas tru long dispela graun na long bihain long heven tu.

Sapos yu laik save moa; toktok wantaim wokmeri bilong Bikpela, Barbara Lunge, Rivers of Grace Intenesenal Ministri. P.O. Box 3063. Boroko. NCD. Papua New Guinea. B Mob 67331426 OR 71075829 DG.



Pasto Daniel Hewali, interim Siaman i sanap wantaim tupela liklik meri i putim bilas na wetim Minista Tkachenko long kam long lonsim.

Taurama Veli i kamapim Komyuniti Diveopmen Asosiesen

Frieda Sila Kana i raitim

MEMBA bilong Pot Mosbi Saut na Minista bilong Spot na 2015 Pasifik Gems, Justin Tkatchenko i bin lonsim Taurama Veli Komyuniti Diveopmen Asosiesen long Trinde, 3 Julai, 2013 ausait long haus lotu bilong Agape intadinominesenal Ministri long Taurama Rot.

Taurama Veli Komyuniti Diveopmen Asosiesen em kamap long tingting bilong Sinia Pasto bilong Agape Intadinominesenal Ministri, Pasto Daniel Hewali, na ol arapela bikman husat i baim graun na nau i stap long Taurama rot. Dispela Asosiesen bilong ol i kamap long strongim Lo na Oda biong ol lain i stap long ol setelmen long dispela rot long Vadavada na i go klostu long Taurama Bareks. Dispela hap nau i gat ol bisnis na sios tu i stap.

Ol i makim pinis wanpela interim komiti na eksekutiv long ol i go pas long asosiesen na tu ol i kamapim sampela Bai-Lo. I gat lo bilong stopim pasin bilong salim bia na dring bia insait long komyuniti, tambu long karim samting bilong bagarapim o kilim man, pasin bilong pilai kas, bingo, salim na yusim drag, stopim nois long 11 nait na ol arapela pasin we i save bagarapim sindaun

bilong famili na komyuniti.

Long taim bilong lonsim asosiesen, Minista bilong Spots na 2015 Pasifik Gems na Memba bilong Pot Mosbi Saut Elektoret, Justin Tkatchenko i tok em i amamas wantaim wok bilong komyuniti na em i laik wok wantaim ol.

Em i tok, em i amamas slong sios i go pas long dispela gutpela wok wantaim Pasto olsem siaman na em i laik wok wantaim ol asosiesen long kamapim gut sindaun bilong ol.

Em i wanbel long ol bai lo na i tok em ol i gutpela long komyuniti na em yet olsem Spots Minista, i ken helpim ol yut long kamapim moa spots long eria na bai ol i ken lukautim wok diveopmen na Lo na Oda.

Sapot bilong NCDC tu i stap wantaim presens bilong Lika Laisens Supavaisa bilong NCDC husat i tok, NCDC bai luksave ol resolusen na Bai Lo bilong asosiesen. Em i tok bai em i givim i go long ol lida bilong NCDC lika.

2OIC bilong Taurama Difens Fos Bareks i makim maus bilong Stanley Benny, CO bilong Taurama Bareks, na givim olgeta tok orait long ol lain long Taurama Veli Komyuniti bikos em i rot bilong ol Difens Fos long go i kam.

2OIC i tok em i sapotim dispela gutpela wok na em

i tok, i tru ol i nogat pawa long arestim man i mekim trabel tasol ol i ken wok wantaim polis long mekim dispela.

“Sapos wanpela samting i kamap long komyuniti, dyuti opis i mas save,” em i tok.

Em i tok orait long ol resolusen bilong Asosiesen i ken go long dyuti opis bilong Difens Fos na tu givim kopi bilong em i go long Metropolitan Superintendent bilong Police na Hohola Polis Stesin Komanda.

Interim Siaman, Pasto Daniel Hewali i tok Diveopment bai i no nap kamap gut sapos Loa na Oda i no stap.

“Sapos ples i no gat gutpela pasin i stap bai ol lain bilong givim sevis i no nap kam. Wanem samting mipela i gat em ol lida bilong komyuniti i wanbel long em wantaim ol lidaman bilong ol. Sampela bilong ol lain i givim sevis i save stap long dispela rot kain olsem Difens Fos. Olsem na ol pipel i mas bihainim ol Bai-Lo mipela i gat na NCD bai mekim wok bilong ol long bihainim wanpela bilong ol dispela bai-lo em long stopim salim na dring bia insait long Taurama Veli rot,” Pasto Hewali i tok.

“Planti lo na oda problem i save kamap taim ol man na meri i dring bia na spak. Sapos yu laik dring,

yu dring ausait na bihain yu ken kam bek long eria. Mipela tok tenkyu long PNGDF na NCDC na Minista bilong Spots na 2015 Pasifik Gems, Honerabel Justin Tkachenko long sapotim ol Bai-loa bilong lukautim komyuniti,” em i tok moa.

Sios i kam insait olsem patna long bringim senis bilong spirit, bodi na sol, olsem na Pasto Daniel em i stap insait long dispela asosiesen. Sios bai mekim wok bilong autris insait long dispela eria. Jisas Kraus em i hetman bilong bringim bel isi. Jisas i mas stap laip insait long hat bilong wanwan man meri na insait long komyuniti. Olgeta lain i mas givim laip bilong ol long Jisas na God bai kisim bek ol. Sapos Minista bilong Spots i ken helpim ol yut long pilai spots, em ol bai lusim pasin bilong bagarapim sindaun long komyuniti.

Agape Intedinominesenal Ministri i gat patnasip pinis wantaim ol lain bilong Eben Yut program long givim ples bilong ol i ronim ol Yut skils training. Asosiesen eksekutiv tu i askim long wanpela Kop sop o polis pas wantaim liklik lain polis long lukautim. Ol i tok tu olsem polis pos i ken yusim ol yut long mekim wok sikiriti na ol yet i ken save long lukautim ples.



KOMENTRI

Ol pekato bilong ples tudak, bai kamap klia

WANEM samting yu mekim long ples hait, bai kamap long ples klia yet.

Dispela toktok, ol lida bilong yumi i mas tingim taim ol i laik mekim wanpela kain hait samting.

Tude, wantaim olgeta kain kain nupela teknoloji i kam long han bilong yumi ol pipel, em i hat moa long mekim samting i hait.

Watpo na yumi tok lukaut long ol lida? Bikos yu ken wanpela gutpela lida, i gat ol strongpela bilip na husat i save mekim strongpela ol toktok, tasol sapos yu mekim wanpela liklik paul pasin long ples tudak, i gat rot long dispela hait samting i painim lait na kamap ples klia.

Ol lida bilong yumi i nogat banis long lait. Tasfos SWEEP i soim mipela pinis olsem maski lida i hait na stilim mani, o i mekim giaman pasin long kisim nating mani, lait bilong trupela tok na luksave, i save strong moa. Na loa bai holim yu yet.

Tasfos SWEEP, na strongpela bilip bilong siaman Sam Koim, i bin bringim bek bilip long mipela olsem ol bikpela stilmanmeri bai no inap abrusim mekimsave.

Dispela bilip i noken lus nating. Nau, yumi lukim planti bikpela senis i wok long kamap long kantri na pipel bilong yumi.

Gavman nau i wok long laikim senis i mas kamap kwik. I gat sampela ol nesanel program we bipo ol gavman i save tok ol i no inap mekim, nau dispela gavman i soim rot na kamapim.

Em i gutpela, tasol ol i mas strongim wok bilong ol, wantaim ol gutpela pasin na bel tingting bilong ol tu.

Insait long wol tude, ol manmeri, na bikpela ol ogenaisesen, i save gut tru long we bilong giamanim na grisim ol lida manmeri. Ol lida bilong yumi noken abrus na pundaun long ol.

Strong bilong maus bilong ol pipel bilong yumi tude, i no pairap tasol long iau bilong narapela.

Nau, maus bilong wanpela man, i ken pairap i go long iau bilong planti tausen manmeri, long namba wan taim tasol.

Tokwin nau, i save karim bikpela hevi taim em i lusim maus bilong wanpela.

Ol masin yumi gat tude, i ken kamapim planti gutpela wok, na i ken bringim tu, planti paul tingting na save.

Wanpela banis long dispela kain ol paul pasin, em long stap tru long bel, tingting, na bilip bilong yumi wanwan.

Stap strong na sanap long pasin we i stret, na bel we i gutpela, bihainim gutpela na stretpela tingting.

Sapos yumi nogat hait tingting na laik, bai yumi no inap long hait long ples tudak na mekim samting.

Olgeta wok bilong yumi bai stap ples klia, na bai isi moa long painim ol stilmanmeri i save yusim blanket bilong ples tudak long mekim paul pasin bilong ol.



Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500
Websait: www.wantokniuspepa.com

Pe bilong wanpela yia, 52 niuspepa

**Pe bilong wanpela yia
52 niuspepa**

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

Published at
Able Building Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



BAI STRONGIM OL ASPLES: Praitim Minista Kevin Rud i tok em strongim lukluk bilong Asples Australia insait long Konstiusen insait long narapela tem olsem praim minista sapos ol i votim em gen. Paitim tok o dibet long lukluk o glasim gen ol Asples Australia i kirap gen taim ol i selebretim 50pela krismas bilong Yirrkala bak petisen, we i opim rot long Asples graun raits muvmen.

komiti, Dinnis Ealedona, i tok PNG Helt Minista, Dokta Michael Malabag, nau i opisal ges long dispela bung.

Scott Morrison bilong koalisen pati i tok Australia i noken harim ol narapela kantri

MAUSMAN bilong Oposisen long Imigresen, Scott Morrison, i tok Australia i no bihainim tingting bilong ol narapela kantri long we em i skelim ol polisi na disisen bilong ol asailam sika.

Insait long wanpela tokbung namel long Australia na Indonesia, em i bin tok eksen bilong wanpela grup i go long lukautim boda inap kamapim wanpela wokbung bilong olgeta kantri olsem wanpela rijen long bikpela hevi bilong asailam sika. Dispela toktok i luk olsem ol i bin toktok long wanpela polisi aidia bilong Kolisen long tanim bek ol bot i go long Indonesia.

Tasol Mista Morrison, i tok man bilong Imigresen long Oposisen pati i tok Australia yet i mas mekim disisen na i no ol narapela kantri.

Em i tok dispela tokbung bilong tupela lida i toktok long Leba Gavman taim ol i rausim 'ofso prosesing', na i no pati bilong en.

Scott Morrison i tok gen long toktok bilong John Howard, taim em i tok. 'Mipela yet bai larim ol pipel i kam insait long kantri, na i no ol narapela kantri.'

Praitim Minista Kevin Rudd i kam bek pinis long Australia bihainim ol toktok wantaim Presiden Susilo Bambang Yudhoyono insait long Indonesia long las wik Fraide.

Mista Rudd i bin tok tupela liada wantaim i tok orait long holim wanpela konfrens long stretim isiu bilong ol asailam sika, long kamap long pinis bilong dispela mun, Julai.

Scott Morrison i tok wanem ol disisen na polisi ol i mekim long asailam sika, em i mas lukautim olgeta intres o sindaun bilong Australia, na i no narapela kantri.

Yangpela Ni-Vanuatu i kisim helpim bilong Australia dokta

DISPELA yangpela boi, Edwin Kawas, i bin kisim

wanpela bikpela operesen long tupela lek bilong en long 2010.

Tupela lek bilong en i bin krungut na wantaim halivim bilong lain Rotary Oceania Medical Aid for Children (ROMAC).

Planti yangpela boi na gel i kisim bikpela helpim bilong ol dokta bilong Australia. Wantaim lain bilong ROMAC, ol i save kisim narapela sans long laip bilong ol.

Edwin Kawas bilong Tanna Ailan, em i wanpela long dispela ol yangpela boi. Taim em i bon, mama na papa bilong en i bin lukim olsem i no rong wantaim em, olgeta hap bilong bodi i orait na nomol.

Tasol taim em i wokabaut, ol i lukim olsem tupela lek bilong en i krungut. Wantaim helpim bilong ol pipel long ailan na Vila na ROMAC, em i kisim namba wan bikpela operesen long 2010, na long mun Jun, em i kisim namba tu operesen.

Na dispela i bin kamap long wanpela long ol biknem haus sik long Brisben, Mater Haus sik.

Edwin i tok em i laikim tru ol kaikai bilong Australia olsem apol. Kas bilong ol yangpela.

Sonia Kawas, em i mama bilong Edwin, na em i tok sapos olgeta samting i rong gut, bai ol i flai aut lusim Vila long Sarere.

PNG famili askim ol atortiti long painim hau 5-pela yangpela saintis i lus

OL famili memba bilong faivpela saintis bilong Papua Niugini Medikal Risets Institut i bin go lus tupela yia i go pinis, i tok ol i mas holim wanpela bikpela wok painimaut long rot ol saintis i go lus, na i nogat wanpela samting i kamap long painim ol.

Ol famili memba bilong faivpela ol Medikal Risets Institut saintis bilong Papua Niugini i bin go lus tupela yia i go pinis, i wok long wet yet long wanpela gutpela wok painim i mas kamap.

Dispela ol saintis i bin go lus long solwara bilong Wes Nu Briten provins long mun Ogas 2011, na i kam inap nau, i nogat wanpela gutpela ripot yet long wanem samting tru i bin kamap long ol.

Stat long taim dispela ol saintis i bin go lus long namba wan de bilong mun

Ogas, ol i bin lonsim wanpela ses na reskiu wok. Dispela i bin go het long sevenpela wik, na ol i stopim bihain long ol i no bin painim sampela kain sain o mak bilong ol i stap laip.

Wokabaut bilong ol i go long Wes Nu Briten provins i bilong mekim risets long sik malaria.

Ol famili nau i mekim wanpela singaut wok long kirapim gen ol wok painim na askim ol atortiti long noken lus tingting.

Maso Oakiva Raka, susa bilong Tania Oakiva, wanpela long ol saintis i lus, i autim bikpela kros bilong en i go long bos bilong ol, Institut ov Medikal Risets long Goroka, long oli no mekim moa long painim ol saintis.

Em tui tok gavman bilong Papua Niugini i no luksave long dispela bikpela hevi na wari bilong ol, bikos ol i laik save long wanem samting tru i kamap long ol famili memba bilong ol.

Honiara Polis Komanda i tok lukaut long ol memba i brukim loa

POLIS Komanda bilong Honiara Siti, Gabriel Manelusi, i givim wanpela tok lukaut long ol polis memba bilong en long husat i brukim loa na mekim nabaut long pablik, bai stap long wanpela investigesen bilong fos.

Polis Komanda bilong Honiara Siti, Sif Suprintenden Gabriel Manelusi, i bin mekim dispela toktok bihain wanpela ripot long Solomon Star, i bin karim wanpela stori long sampela lain i bin go komplem long pepa.

Ol i sutim tok olsem sampela Of Duti memba bilong Polis fos i save yusim ol pablik trenspot olsem haia kar, na teksi, na ol i no save peim.

Sif Suprintenden Gabriel Manelusi i tok polis i gat ol loa bilong en long dil wantaim ol kain lain olsem.

Em i tok tu olsem dispela komplem i no kamap long opis bilong en yet.

Em i tok polis koman i gat we we ol bai lukluk long ol wari na holim wanpela wok painimaut long ofis.

Em i tok dispela komplem i no save kamap oltaim, tasol i gat yet ol 'rul na regulesen' em ol polis fos memba i mas bihainim oltaim.

Ol pipel bilong Aneityum long Vanuatu i laikim Kastoms Opis

GAVMAN bilong Vanuatu i mas traim long opim opis bilong Kastoms long Aneityum Ailan, em ailan i stap long sauten hap bilong Vanuatu, long halivim wok turisim.

Planti turis bot em ol i save pulap tru long ol turis, i save go sua long Mystery Ailan, klostu long Aeityum, long wanwan mun.

Na planti long ol dispela turis i save laik baim ol bilas bilong ples, ol kaving, na ol narapela samting em ol i mekim long ol samting i kam long bus, tasol ol turis i no inap baim ol dispela samting, long wanem, ol i mas kisim tok orait long Kastoms pastaim.

George Saravia i wanpela long ol pipel i save salim ol ats na kraf long ol turis. Em i tok stat long 1983, ol

turis bot i save go long ailan na dispela i givim ol pipel mani tasol ol i save painim hat long salim bikos i nogat Kworentin na Kastom opis long sekim na putim stem long en.

Solomon Ailans makim namba 35 Indipendens Anivesari

PLANTI tausen pipel bilong Solomon Ailans long kantri yet na long olgeta hap long wol, i wok long selebretim namba 35 anivesari bilong kantri i kamap indipendens.

Solomon Ailans i bin kisim indipendens long rul bilong Inglen long namba 7 de bilong mun Julai, 1978.

Namba 7 long Julai i bin kamap las wik Sande, tasol bikpela selebrensen long Solomon Ailans, ol i mekim long Mande, we em i wanpela pablik holide long kantri.

iti olsem pareid, ol spot pilai, na wanpela musik festival i kamap long Lawson Tama stadium.

Wanpela hailait bilong de em pareid bilong Royal Solomon Ailans Polis Fos, wantaim polis na militari o ami bilong Fiji.

Fiji Praitim Minista, Komodo Frank Bainimarama i bin inspektim Gad ov Ona we polis na ami bilong tupela kantri i mekim.

Dairekta bilong Solomon Ailans gavman komyunikesen yunit, George Herming, i tok pipel long Honiara i amamas tru long makim dispela bikpela de bilong kantri na i wok long rausim long lukluk long olgeta kain ektiviti.

Long wiken, ol Solomon Ailans komyuniti long olgeta hap long wol, i bin wokim liklik bung bilong ol tu long makim namba 35 Indipendens Anivesari bilong ol.

Ol Solomon Ailans pipel long Pot Mosbi, na ol PNG pren bilong ol tui bin selebretim dispela de.

SiAmeri bilong ogenaising

Pacific BEAT Listen to Radio Australia 101.9FM Port Moresby
4. 5. 6am & 4pm. 5pm including sport
Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

Brukim Ramu riva em taim bilong tumbuna

Mathew Yakai i raitim

NOGAT wanpela man i bin save olsem tete bai ol pipel bilong Bundi insait long Madang provins husait i stap long Kurumbukari main ples olsem Kinimati, Miai, Enekuwai bai drive long kar na ron antap long bris bilong Ramu Riva tete. Tu, nogat wanpela man i bin save olsem tete bai ol ron long kar na go long haus lain stret.

Bikpela Ramu Riva na maun-tain i bin kamapim bikpela birua stret na mekim laip bilong ol pipol i hat tru bipo. Olsem na planti lain insait long kantri i save kolim ol lain Bundi em "bek page".

Bikpela birua bilong ol bipo em traipela mama bilong Ramu wara na bikpla maunten bilong Butua (KBK), we i daunim save bilong ol man i save wokim bris na rot, sivol enginia. Taim PNG i kisim independens na kantri i lukim lait, Bundi i bin stap long tudak na pasin bilong tumbuna.

Ol mama i karim pikinini long bus bilong wanem, nogat hausik. Planti bilong ol sik manmeri na pikinini i bin dai bikos nogat marasin. Ol pikinini i no go long skul bikos nogat tisa na klasrum. Taim ol i laik go long taun, ol i wokabout long bus, tais, maunten, na long Usino Jangsen, ol i haitim deti klos bilong ol na go long taun. Taim ol I kam bek, ol i senis igo long doti klos na wokabout.

Long 2003 taim Ramu NiCo i bin kamap long dikim nikel na kobalt, nogat rot i bin stap. Ol i katim bus, pusim kar, kamap long Ramu Riva, wokim bikpela bris, kamap hapsait, katim maunten bilong Bundi na tete, mekim laip bilong ol asples i gutpla na isi stret.

Ol China i wok strong wantaim bikpela bilip olsem, "sapos yu laik divelepim wanpela ples orait wokim rot na bris pastaim." Tete, pasin bilong brukim Ramu Riva, wokabout long tais, kalapim maunten na tais wara em tumbuna stori. Papamama, pikinini na tumbuna i ken kirap long moning na go long Madang taun na kam bek sem taim long kar. Dispela senis i kamap tasol long 2004 i kam inap tete, i no long taim i go pinis.

Tru long dispela bris bilong Ramu Riva na rot, divelepim i kamap stret long KBK na Bundi. Ol asples we bikpela nikel na kobalt bai benefitim PNG em nau ol i kirap bek long trupela luksave bilong divelepim we ino ol bipo gavaman bilong Australia or PNG gavaman i kisim kam tasol MCC-Ramu NiCo i kamapim.

Tete rot i orait, na gavman sevis bai kamap. Na dispela hap ples bilong Bundi we gavman i no bin kisim wanpela sevis i go ya bai tete i gat dispela nikel main we bai givim bikpela win moni i go long ol papagraun na tu gavman bilong PNG.

Ananit long luksave bilong gavaman bilong China, bikpela kolta rot na bikpela na strongpela bris ol i



1

1. KBK Main ekse rot we ol i wok long em nau.

2. Ramu NiCo bris we Ramu NiCo i wokim.

3. Rilokesin eria long Enekuwai i gat nupela skul nau.

4. Vais Presiden, Mista Gu (namel) wantaim tupela wok man sanap long nupela na strongpela bris.



2



3



4

bin wokim stat long Usino Jangsen i kam inap long Yamagi, insait long Usino LLG. Tasol Ramu NiCo i ting olsem dispela 10km rot long Ramu Bris i go antap long KBK Main ples i mas kamap gutpela stret na nogat kalap kalap na bump bump tumas. Na tete, PNG SJ kampani i wok long stretim hap rot antap long maunten we taim pinis bai benefitim ol papagraun na kampani tu.

Deputi Jenerel Menesa bilong Enjiniring Menesmen Dipatmen, Meng Jiazi, i tok dispela 10km rot

em i bai gutpela stret na wankain olsem ol gutpela na strongpela rot we ol i save mekim kamap long China.

Mista Meng i tok rot namel long Usino Jangsen na KBK Main i mas gutpela stret na ol pipel wantaim Ramu NiCo kampani i mas kisim gutpela sevis taim ol i ron long en.

Ol wokman bilong China na PNG ananit long PNG SJ i wok hat stret long pinisim dispela rot long Septemba. 8-pela enjinia bi-

long China na 20-pela wokman bilong PNG i mekim rot wok long kamapim dispela bikpela na gutpela sevis i go long ol pipel.

PNG SJ em sem kampani we i bin mekim rot na bris namel long Usino Jangsen na Yamagi na ol i gat bikpela bilip long wokim wankain stail rot namel long Ramu Riva na KBK Main we bai helivim planti lain husait i laik husim rot ya.

Olsem tok piksa ol i save toktok ha, "putim mani long we i gat

maus long em," minim olsem divolopment i mas kamap long we i gat pipel na mani mas noken go lus nating.

Ating moa gutpela yumi lainim dispela tok piksa bilong ol China tu, "sapos yu laik divolopim wanpela asples orait wokim rot na bris pastaim."

Em tru! Pasin bilong brukim Ramu Riva na walkabout brukim bus, tais na maunten em taim bilong tumbuna. Ramu NiCo i kamapim lait long Bundi pinis!



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta

Program Director - YUMIFM - Kasty

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...



Eka Kela Keapu sanap wantaim Ambeseda bilong USA long Gateway Hotel taim ol amamasim bon de bilong USA. Eka tu i amamasim bon de bilong em wantaim ol. Poto Nicky Bernard.

Bon wantaim US Independens

Nicky Bernard i raitim

TAIM bilong makim bon de bilong yumi wanwan, yumi save amamas long sampela kain wei long tingim mama karim

yumi. Sampela yumi makim long taim wanpela bikpela de kamap na yumi bin bon long dispela taim.

Wanpela bikpela nem poto man bilong kantri na poto man bilong Na-

tional Niuspepa, Eka Keapu i save amamasim bon de bilong em wantaim ol US, (Amerika).

Ol Amerika (USA) save amamasim bon de bilong kantri bilong ol

long Julai 4, na dispela de mama karim Eka.

Long las wik ol Amerika amamasim 200 na moa yia bilong ol long Julai 4, Kela Eka, tu i ting yia bilong em olsem mama karim em

na em stap long ples graun 53 yia olgeta.

Taim Amerika amamasim de bilong ol, dispela mangi US bilong Kerema tu bin go stap wantaim ol USA na amamas wantaim ol.

EMTV Television Guide

FONDE JULAI 11, 2013

4:57 AM G AUSTRALIA NETWORK
5:00 AM G JOYCE MEYER Ep#1033 - 4
5:30 AM G EMTV NEWS REPLAY
6:00 AM G TODAY

7:00 PM G RAIT MUSIK Ep#168
8:00 PM G RESOURCE PNG EP#78
9:00 PM G SOKA XTRA
9:08 PM G HOT SPOT EP#21

FRAIDE JULAI 12, 2013

4:57 AM G AUSTRALIA NETWORK
5:00 AM G JOYCE MEYER Ep#1033 - 5
5:30 AM G EMTV NEWS REPLAY

10:36 AM G THE AMAZING SPIDERMAN
12:50 PM G HOODWINKED
2:10 PM G GNOMEO & JULIET
3:30 PM G KIDS KONA

SARARE JULAI 13, 2013

4:57 AM G AUSTRALIA NETWORK

6:30 AM G EMTV NEWS REPLAY
7:00 AM G HILLSONG- Ep#856
7:30 AM G AUSTRALIA NETWORK
8:00 AM G YOGA SUTRA Ep#16 "Stress"

11:30 AM G AROUND THE WORLD IN 85 PLATES (Ep#31)

SANDE JULAI 14, 2013

6:00 PM G EMTV NATIONAL NEWS
EMTV brings you what's happening around the country and abroad in news, sports and weather.

6:30 PM G PACIFIC WAY S8 - EP#3
7:00 PM G TOK PIKSA EP#25

7:30 PM G NRL ROUND 18

9:30 PM G 60 MINUTES - EP#20
Join 60 Minutes Reporters; Michael Usher, Charles Wooley & Liz Hayes as they bring you interesting life stories from around the Globe.

TORO



BIABIA



KANAGE



TOKWIN

Husat tru kilim ol Saina long Koki....

PNG em olsem wanem nau? Tupela mun i go pinis ol mekim Deth Penalti olsem i wanpela Mama Loa pinis tasol kilim dai nating wok long kamap bikpela tru i stap..Hap aste tasol sampela birua i go kilim dai nating wanpela Saina femili long koki stua long 8kilok moning we nogat man o meri i save. Tude nau polis wok long mekim wok glasim long kisim ol dispela birua lain. Liklik tokwin i go

olsem, ol birua husat i kilim ol em ol lain bilong ol yet husat i kamapim wanpela kain Mafia kain wok insait long ol Saina komyuniti insait long PNG...Tingim stori long bifo tru we sampela ol Saina i dai long wankain birua long Hohola bekeri stua insait long Mosbi. Tokwin i go olsem ol Traiads bilong Saina i kilim ol.. Dispela tu mas wankain!

Det Penalti i kamap, tasol ol man i no harim gut yet...

Planti kilim dai nating man i wok

long kamap bikpela yet long ol siti. Yumi ritim pinis na harim gut pinis long redio olsem gavman i oraitim mama loa long Det Penalti.

Tasol long laswik tasol ol birua i kilim dai nating wanpela man long Morata na tromoi bodi bilong em long fran bilong haus bilong wanpela man... na long Lae, ol raskol i kilim dai nating wanpela sumating long mobail fon bilong em tasol... Ol birua i no pret long ass bilong deth penalti.

Ating yumi kilim wanpela trabol man long pablik na ofim sampela pastaim..

Hariap na stat wok long det penalti!

Tokwin Tasol...

Long yupela ol gutpela Wantok rida i save wokim ol Sudoku kroswod pasel, dispela em nupela SUDOKU.

Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilo tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE

		7	9					1
2	3	8				6	7	
		6		2	7			
7	8	5						
5	2		6		3			
			1		9	5		
			6	3		8		
8	4				9	2	1	
2					1	3		

EXAMPLE SOLUTION

8	4	7	9	6	3	5	2	1
1	2	3	8	4	5	6	7	9
5	9	6	1	2	7	4	8	3
9	7	8	3	5	4	1	6	2
4	5	1	2	9	6	7	3	8
6	3	2	7	1	8	9	5	4
7	1	9	6	3	2	8	4	5
3	8	4	5	7	9	2	1	6
2	6	5	4	8	1	3	9	7

Ansa bilong las wik SUDOKU

5	1	3	4	7	6	8	2	9
4	8	7	2	9	1	5	3	6
2	6	9	3	5	8	1	7	4
9	2	5	7	1	4	3	6	8
7	3	8	6	2	5	9	4	1
6	4	1	8	3	9	7	5	2
8	7	6	1	4	3	2	9	5
3	5	4	9	8	2	6	1	7
1	9	2	5	6	7	4	8	3

5		1			3			6
	7					2		4
6			7	4	9	8		
	5	8	2		4	7		
				9				
		7	1		6	5	4	
		5	3	6	1			2
4		3					8	
2			4			1		3

Ansa bilong SUDOKU long neks isu.

EMTV Television Guide

10:30 PM MAO **SUNDAY NIGHT MOVIE**
- "The Bodyguard"
Drama | Music | Romance
A pop singer has been receiving threatening notes, and her manager hires a bodyguard known for his good work. The bodyguard ruffles the singer's feathers and most of her entourage by tightening security more than they feel is necessary. The bodyguard is haunted by the fact that he was on Reagan's secret service staff but wasn't there to prevent the attack by Hinckley. Eventually the bodyguard and the singer start an affair, and she begins to believe his precautions are necessary when the stalker strikes close to home.

12:30 AM G **HILLSONG** Rpt...#856

1:00 AM G **NATIONAL EMTV NEWS - Replay**
.....followed by the Australia Network

MANDE JULAI 8, 2013

4:57 AM G AUSTRALIA NETWORK
5:00 AM G **JOYCE MEYER Ep#1033 - 1**
5:30 AM G **EMTV NEWS REPLAY**
6:00 AM G **TODAY**
09:00 AM **N/EDUCATION MEDIA CENTRE**
MALOLO CLUB -
12:00 PM G **CARS (Animation)**
2:00 PM G **SHREK - Forever After**
3:30 PM G **KIDS KONA**
3:30 PM **HI 5 - SS Ep#6/33**
4:00PM **SNOBS # 17 (Family Drama)**
4:30PM **FOREIGN EXCHANGE #12 (Comedy)**
5:00 PM G **KITCHEN WHIZ S3 - Ep#20**
5:30 PM G **TOTALLY SPIES Ep#9**
"Abductions"
5:57 PM G **CRIME STOPPERS**
6:00 PM G **EMTV NATIONAL NEWS**

7:00 PM G **PNG POWER - 50TH ANNIVERSARY**
7:30 PM G **NRL ROUND 16**
ROOSTERS vs. SEA EAGLES
9:00 PM G **COCA-COLA SPORTS SCENE**
EP#22
9:30 PM G **EMTV NEWS REPLAY**
.....followed by the Australia Network

TUNDE JULAI 9, 2013

4:57 AM G AUSTRALIA NETWORK
5:00 AM G **JOYCE MEYER Ep#1033 - 2**
5:30 AM G **EMTV NEWS REPLAY**
6:30 AM G **TODAY**
09:00 AM **N/EDUCATION MEDIA CENTRE**
MALOLO CLUB
12:00 PM G **THE DESCENDANTS**

2:00 PM G **FLIPPER**
6:00 PM G **EMTV NATIONAL NEWS**
7:00 PM G **HAUS & HOME #21**
8:00 PM G **BUSINESS PNG - Ep#24**
8:30 PM PGR **BODY OF PROOF**
Australia Network

TRINDE JULAI 10, 2013

4:57 AM G AUSTRALIA NETWORK
5:00 AM G **JOYCE MEYER Ep#1033 - 3**
5:30 AM G **EMTV NEWS REPLAY**
6:00 AM G **TODAY**
N/EDUCATION MEDIA CENTRE
NATIONAL IN-SERVICE SCHOOL
TRAINING
MALOLO CLUB
FIREPROOF
12:00 PM G **FINDING NEMO**
2:00 PM G

5:57 PM G **CRIME STOPPERS**
6:00 PM G **EMTV NATIONAL NEWS**
EMTV brings you what's happening around the country and abroad in news, sports and weather.
7:00 PM G **FACT FILES - Great Animal Escapes Ep# 1 & 2**
8:00 PM G **TOK PIKSA Ep#24 - Repeat....**
A repeat of the Sunday's Tok Piksa Program.
8:30 PM **THE ARROW - PREMIERES..... "Pilot"**
9:30 PM G **EMTV NEWS REPLAY**
.....followed by the Australia Network

Ol Program na Kilok i ken senis oltaim...

Raun wantaim Kanage olgeta wik



NEM: Nick Kwau
KRISMAS: 30 (Man)
ADRES: PO. Box 1349, Wewak, East Sepik Provins
SAVE LAIKIM: Ritim buk, singsing, go Lotu, mekim pren wantaim arapela and trevol.

NEM: Raphael Iwap
KRISMAS: 18 (Man)
ADRES: St. Michael Secondary School, PO. Box Private Mail Bag, Madang Provins
SAVE LAIKIM: Pilai gems, pilaim musik, operetim Kompyuta, wok teknisen, ritim buk, na go long skul

NEM: Vincent Awon
KRISMAS: 30 (man)
ADRES: Kamate Coca Co-operative Society Limited, PO Box 298 Madang Provins
SAVE LAIKIM: Welding, cocoa trenna, menesim bloks, Raising Beans long ekspot, mekim fani, harim musik na painim wanpela meri long maritim na stap wantaim oltaim.

NEM: Junior B. Dadis
KRISMAS: 32 (Man)
ADRES: College of Distant Education, PO Box 2071, Yomba, Madang Provins
SAVE LAIKIM: Go danis, harim reggae musik, lukim CD, tok pilai na go swim

NEM: Jason Elmon
KRISMAS: 19 (Man)
ADRES: Bema High School, PMB Bema, Lae Post Office Morobe Provins
SAVE LAIKIM: Mekim pren, pilai soka, go Lotu, mekim fani na toktok wantaim ol narapela lain.

NEM: Gabriel Bania
KRISMAS: 23 (Man)
ADRES: St. Christopher Primary School Turubu East Coast, C/- Bill Orenge PO Box 466, Wewak ESP
SAVE LAIKIM: Autim tok bilong God, serim toktok ol samting, pilai gospol musik, helpim na mekim wok marimari na go Lotu.

NEM: Jenna Hill
KRISMAS: 35 (Meri)
ADRES: PO Box 90, Adoagyiri, Nsawam Ghana, West Africa - 00233 541705015 e-mel: waysofl@yahoo.com
SAVE LAIKIM: Kantri musik, kukim kaikai, raitim pas na painim wanpela man long maritim

NEM: Rex Yatapsa
KRISMAS: 30 (Man)
ADRES: Wambi DC, PO Box 352, Bulolo Morobe Provins
SAVE LAIKIM: Go Lotu, serim tok bilong God wantaim arapela, stretim hevi bilong ol arapela manmeri, Wok gol na wokim gaden.

NEM: Robert Daniel
KRISMAS: 14 (Man)
ADRES: Kanabea Catholic Mission, PO Box 90, Via Kerema, Gulf Provins
SAVE LAIKIM: Pilai gita, volibol, soka, tats, mekim fani, stori, watsim TV, harim Lotu musik, go skul, tek pat long yut wok, go Lotu na lukautim ol enimal na plans.

NEM: Awaten Kembo
KRISMAS: 20 (man)
ADRES: Bema High School, PMB Lae, Morobe Provins
SAVE LAIKIM: Pilai volibol, vok, basketbol, harim musik, mekim fani, go Lotu, ritim buk na niuspepa na stori wantaim ol poroman-meri.

Enimol Kila
KANAGE wantaim tripela poroman bilong em baim sampela bia na i go dring long haus bilong wanpela wantok long Madang taun. Ol i kilim skin i go na spak nogut tru. Long samting olsem 8 kilok long nait ol kalap long ka bilong Kanage na tekof long Not Kos rot. Kanage draivim ka i go bamim dispela bulumakau. Em nau ka bilong ol i stap. Kanage wantaim tripela poroman bilong em i belhat na kalap kam ausait na stat long boksen wantaim bulumakau. Bihain long samting olsem 10 minit, tripela poroman bilong Kanage i sotwin na i no moa boksing wantaim dispela bulumakau. Kanage em i wanpela strongpela man stret boi pait wantaim bulumakau go na kilim dispela bulumakau. Em nau ol i kalap long ka na tekof. Long narapela de Kanage i pilim olsem olgeta bung bilong em i mau na skin pen olgeta.

Mangi Saut
MADANG

Husat i papa?
WANPELA meri Yauro i go stap long Australia i go na kam bek long ples bilong em. Taim em i kam bek long ples, em i gat bel. Em nau ol bikman long ples i bung na sindaun toktok long painim aut husat i givim em bel. Taim ol bikman i askim meri yah, em i no toktok. Long wanem meri yah i no save long tok ples na tok pisin, em save long tok inglis tasol. Ol i askim i go nogat na Kanage i kirap na askim meri ya olsem, "Who bel yu?" Taim ol

bikman i harim Kanage i tok olsem, ol i holim pasim bel bilong ol na sindaun i stap. Mekim na meri Yauro ya sem pipia stret.

Gwen Toroks
MADANG



Yu laki man ya
KANAGE tokim liklik pikinini bilong em long go baim mutrus bilong em na pikinini tok em i les. Em nau Kanage belhat na kirap paitim em. Meri bilong Kanage harim pikinini kraik na em i siksti kam ausait long haus na askim Kanage. "Kela bun bun, yu pitim nating pikinini long wanem?" Kanage kirap na tokim meri bilong em olsem. "Mama yu noken askim mi dispela kwesten, samting mi wok hat na dispela pikinini kamap, olsem na sapos em i bikhet, mi gat olgeta rait long paitim na skulim em." Em nau meri bilong em kros na kirap tokim em. "Dispela wok bilong wok hat na kamapim ol pikinini yu save tumas. Tasol long wokabout i go na baim mutrus yu pilim skin les." Meri bilong em i tok olsem na mekim Kanage i belhat na kros nogut tru, na i kirap tokim meri bilong em. "Gutpela tru na yu kam maritim mi, na yu stap gut olsem na yu hambak. Ating sapos papa antap i no wokim mi, bai yu

painim man i go nogat na bai yu go poromanim wanpela dok man na karim dispela yau pas pikinini ol i save kolim hapkas dok na sipsip.

Friedson Kipas
BULOLO, LAE.

Planti Refrens musik tumas
WANPELA Fraide nait Kanage pilai laki wantaim ol wantok bilong em long Sandaun kem long Madang. Long wankain taim tu i gat danis long Raikos kem. Kanage pilai laki go na harim olsem ol musik tasol i wok long kamap long danis. Kanage harim dispela ol wankain musik i go na belhat nogut tru. Em nau em kirap na tok "Yupela, ol Raikos ya wok long pilaim tasol ol referens musik bilong ol, na ai bilong mi laik silip nau." Ol wantok bilong em harim olsem na kaikaim graun. Bikos Kanage i laik tok feveret na em i abrus na tok referens.

George Mango
Sandaun Kem-WEWAK.

Ol skwat!
Salim ol gutpela Kanage
tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Sevis i no go long ol pipel long ples

Dia Laipain,
 MI **WANPELA** yangpela man i gat 30 krismas na mi bin pinisim Gret 12 long wanpela Nesenel Hai skul long kantri 5-pela yia i go pinis.

Mi no bin laik painim wok o skruim skul bilong mi i go moa yet, tasol mi bin go bek long ples long helpim famili bilong mi long wok long graun bilong mipela.

Tru, ples bilong mi i stap long rurel eria longwe long taun, tasol mi amamas long mekim ol samting long ples na stap wantaim ol pipel bilong mi.

Wari mi gat long en em mi wok long harim planti toktok long daunim kraim, HIV/AIDS na ol sevis i go long ples, na ol narapela i kam long gavman, ol NGO, ol sios na ol narapela stekholda. Long mekim dispela ol samting, ol i save holim ol woksop ma konprens insait long ea kondisen hotel rum na risot olgeta yia.

Wari bilong mi em wanem taim bai ol ples i kisim ol sevis na tu, wanem taim ol bai holim ol kain konprens olsem long ples na pipel i ken go insait long ol?

Laipain, i luk olsem planti mauswara tumas na nogat kaikai bilong ol na bai yumi mekim olsem long narapela 34 krismas i kam? Nau yet, ol pipel i les na ol i wok long go turangu tasol.

CONCERNED YOUNG MAN

Dia Concerned Young Man,
 Mipela i amamas olsem yu rait i kam long Laipain long serim wari bilong yu wantaim mipela long ol samting i ken kamapim gutpela samting o hevi long laip na sindaun bilong pipel long dispela kantri. Mipela i luksave olsem yu makim maus bilong ol lain long ples na tu long taun na yu autim dispela wari. Mipela i amamas long yu i go bek long ples long stap wantaim ol pipel na bungim ol hevi wantaim ol long ples longwe.

Pren, mipela i sapatim yu long wok yu mekim long ples na bilong yu long skruim i go moa yet. Mipela i luksave olsem em i no isi long husat i pinisim Gret 12 long go bek long ples na painim



samting long em i amamas long mekim. Yu no tokim mipela stret wanem samting yu mekim long ples, tasol i luk olsem yu amamas long samting yu mekim i stap.

Sapos yu stap amamas long ples, yu ting em i gutpela aidia long ol narapela skul liva i go bek long ples na helpim pipel bilong ol? Mipela i bilip em i taim nau long ol yangpela pipel long bihainim samting yu mekim long kamapim senis long ples.

Mipela i lukim daunim ol kraim, HIV/AIDS na lukim olsem gutpela sevis i go long ples bai kamap sapos ol yangpela olsem yu i strongim tingting na i laik mekim ol samting bai wok gut long helpim pipel bilong yumi.

Mipela i ting olsem i moabeta sapos yu redi long rurel ples bilong yu na yu singaut long helpim, ol bai harim nek bilong yu long maunten i go long ol nam-bis ples na ol ailan. I moabeta yu askim ol gavman lain, ol stekholda, ol NHO, na ol sios long kam na harim yu. Yu ken tokim ol tu long noken holim ol konprens na bung long ol motel, hotel na ol risot tasol raun i go long ol ples na toktok long pipel. Tokim ol long noken mauswara nating tasol putim mani long ol eria we ol i mas helpim long kamapim gutpela sevis na go toktok long ol pipel long ol rurel ples.

I gat tripela level bilong gavman i stap na em long 1- Nesenel, 2- Provinsel na 3-Lokol Level Gavman (Distrik) i mas kisim sevis i go long ples.

Yu kam stret aninit long kaunsela husat i makim pipel. Wok klostu wantaim em long kisim ol sevis i go long pipel. Nau gavman i wok long ples bilong 50 yia i kam bai wok long aninit level (bottoms up) i kam antap na yu ken serim ol aidia long wanem i gutpela long ol pipel

na ol bai wok wantaim yu. Yu gat ol ilek-tet memba i gat ol EDF fan bilong pipel na ol i givim aut dispela manimak i go long ol provins long mekim ol wok. Painimaut moa long dispela.

Pren, sapos ol i no kam long yu olsem, yu stretim wanpela delegesen o grup lon g lukim ol lain long atoriti long mekim samting. Laipain i save olsem sampela Palamen memba i mekim samting long kisim sevis i go long pipel bilong ol i go olgeta lon g ol rurel eria. Sapos sampela i mekim samting i kamap, watpo na ol narapela i no inap? Ating i moabeta long rausim ol dispela memba i no wokim samting long helpim pipel, yu ting olsem wanem?

Pren, mipela i bilip olsem yu mekim raitpela samting na i moabeta long serim dispela wantaim ol narapela yangpela pipel i bin skul na i gat save olsem yu.

Mipela i lukim olsem sapos nogat man i mekim samting, ol samting i no inap wok gut. Mipela i nilip olsem ol dispela i stap long atoriti i no wokim samting stret bai kisim taim wanpela de. Ritim Bik bilong Amos, Sapta 5 ves 11 "Yu bagarapim ol turangu lain na stilim ol kaikai bilong ol. Olsem na bai yu no inap stap long gutpela haus yu bildim o dringim wain long niauspepa wain gaden yu bin planim."

Pren bilong yu- Laipain

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laipain

Ramu Projek LOA na Lanco stap long bisnis trening

OL EKSEKUTIV o lain i go pas long ol lenona kampani na ol lenona asosesen insait long Ramu Nickel Projek eria long Madang provins nau yet i sindaun long wanpela bisnis trening progrem long rot long strongim wok bisnis.

Dispela trening bai i ron inap tupela wik na i karamapim planti samting long wanem rot long statim bisnis, ronim bisnis na tu wanem rot long strongim bisnis.

Dairekta bilong Bisnis Developmen brens bilong Madang Provinsal Edministresen, Peter Sagerom i tok dispela trening em wantaim ol ofisa bilong em i ronim em Intanesenel Leba Ofis (ILO) long Geneva na AusAID i

luksave long en na stendet bilong en i antap.

Dispela 2-wik trening em ol i holim long Ramu NiCo Komyuniti Afes ofis long 'Glas-Haus' bilong Ramu NiCo long Madang taun.

Mista Sagerom i tok AusAID na ILO i luksave long planti ol gutpela samting na i givim trening bihainim wanem nid bilong bisnis i kamap long wok na em gutpela long ol LOA na ol LANCOS eksekutiv long stap na lainim ol nupela samting.

Dispela trening we Ramu NiCo Menesmen (MCC) Limited i putim mani long kamapim em long helpim ol eksekutiv bilong ol lenona kampani na lenona asosesen (LOA) insait long Ramu Nickel Projek long save long rot long statim bisnis na lukau-

tim gut bisnis wok bilong ol long ron gut.

Namba wan hap bilong trening we i stap long Mande dispela wik i bungim ol lain LOA eksekutiv bilong Basamuk na Kostal Paiplain.

Long neks wik bai lukim trening bilong ol lain bilong Kurumbukari na Maigari LOA na LANCOS.

Mista Sagerom i tokim ol lain eksekutiv bilong ol LOA na LANCOS olsem dispela trening ol i givim i go wantaim ol plen bilong Gavman olsem Visen 2050 long kamapim moa bisnis wok namel long ol lokal pipel na em i tok tenkyu long Ramu NiCo long sponsa long trening.

Ramu NiCo Komyuniti Afes Jeneral Menesa, Martin



Ol lain LOA na Lanco eksekutiv husat i harim toktok bilong trena Martin Ali long Ramu NiCo CA konfrens rum long Madang.

Paining i bin opim dispela 2-wik trening long Mande, na i givim salens long ol lain

olsem bisnis wok bilong ol lain papagraun i stat pinis tasol wok i stap nau long ol

eksekutiv long menesmen long lukim bisnis wok i go het orait.

Telikom na Huawei sainim K600 milian dil

PNG Telikom i sainim K600 milian wantaim Huawei Teknologi long strongim komyunikesen sevis long kantri long halivim gavman long inap ol wok bilong ol.

Dispela projek bai lukim Huawei Teknologi bai apim mak bilong brodben bilong Telikom na bikpela mani halivim bai kam long Saina Eksim Benk na PNG gavman.

Siamen bilong Telikom Bod Mahesh Patel i tok dispela projek bai kamapim planti wok bilong ol yangpela na tu bai lukim moa long 80,000 kastomas long aben senta na 8,000 komyuniti bai kisim bikpela sevis long opim rot bilong gutpela komyunikesen.

Mista Patel i tok dispela em namba wan projek we kamap long kantri we bai mekim Telikom long kamap bikpela provaida bilong telekomyunikesen long kantri.

Dispela kontrak namel long

Telikom na Huawei bai lukim kamapim Hai Spid broadband sevis go long 100,000 ples long kantri na bikpela namba bilong pipel bai kisim sevis taim projek i pinis insait long tupelo yia.

Dispela kontrak tu bai diliverim ADSL2+ brodben we bai konektim moa long 80,000 kastoma long kantri wantaim hai spid brodben spid long 24Mbps (mega baits long wanwan seken)

Taim Huawei pinis dispela projek bai kamapim ol sampela sevis olsem;

Date Senta, Vidio Konfrensing, Data wehaus bilong storim hai spid volum bilog komyunikesen, e-komes na Wol waid rises wantaim ol yunivesiti na tesari institusen na wok brotkas.

Minista bilong Pablik Entaprais Ben Micah komyunikesen i mekim bikpela wok iekonomik developmen na groa

bilong kantri na tok dipatmen bilong em I amamas long lukim dispela bikpela developmen i kamap bihain long NEC givim tok orait.

Mista Micah i tok bikpela samting olsem 2015 Pasifik Gems na 2018APEC Mitin bai kamap long kantri na dispela projek em bikpela developmen we PNG i konekt long wol na toke m bai wok klostu wantaim PGNG Telikom na Huawei long pinisim dispela projek insait long tupelo yia.

Telikom Bod Siaman Patel i tok moa olsem Huawei Teknologi em i no nupela long ol kain projek long kantri. Em tok Huawei bin mekim wankain wok pinis long kantri long bildim Optikel Graun Raia Sistem long Madang go long Lae pinis na toke m gat bikpela bilip dispela projek bai ron gut wantaim sapot bilong gavman, PNG Telikom na ol arapela developmen patna.

PNG mas stop long salim timba go aut long kantri

PAPUA Niugini gavman mas stop long salim timba go aut long kantri na tu mas putim was long ausait kampani save stilim timba na tu mas mekim save long husat kampani i no peim takis long gavman.

Timba em wanpela bikpela bisnis we bikpela milian kina mani em ol kampnai husat mekim timba bisnis save mekim tasol palnti kampani em ol nogat gutpela tok orait pepa o laisens na planti tu save brukim loa bilong kantri na mekim bisnis long kantri na ronwe wantaim bikpela milian kina winmani.

Gavena bilong Oro Garry Juffa i tok nau em taim bilong PNG mas stop long salim timba go aut na tu mekim save long kampani i no bihainim loa na mekim bisnis.

Mista Juffa i tok planti kampani i no save peim takis long gavman, na dispela em

bikpela asua bikos long timba gavman bai mekim bikpela mani long takis.

Mista Juffa long palamen i no kolim nem bilong kampani i asua tasol em tok dispela pasin i wok long kamp stap long kantri na singaut long minister bilong Forest Patrick Pruaitch long kamapim sampela rot long daunim ol dispela hevi na tok tok gavman mas wok bung wantaim bikpela timba kampani long kamapim daun strim processing o mekim ol pinis prodak bilong timba long kantri.

Minista bilong Porest Patrick Pruaitch i tok gavman putim mak olsem long yia 2020 kanti bai stop long salim timba go aut long kantri.

Mista Pruaitch i tok daun strim processing i stat pinis long kantri we nau Cloudy Bay kampani i statim pinis.

Minista Pruaitch i tok kampani i no peim takis na stilim timba em bikpela hevi tru long kantri na tok olgeta gavena na lidas long ol provins we gat timba bisnis mas putim was na sapos wanpela kampani ol i painim asua mas tok save long loa bai mekim save long dispela kampani.

Minista Pruaitch i tok Nesenel Pores Autoriti bai kamapim wanpela kampani long go pas na bai lukluk long olgeta hevi na wari bilong timba bisnis long kantri. Em tok timba bisnis em bikpeela bisnis na planti yut na skul drop aut ken kisim wok long dispela indastri.

Minista Pruaitch i tok gavman nau lukluk long sapotim ol bisnis olsem timba na agrikalsa long kantri na tok husat kamapim i stil nau mas stop na mekim bisnis aninit long loa.

Dia fam bisnis kirap long Saut Flai

OK Tedi Developmen Faundes Limited, nau i wok-bung wantaim ol komyuniti long Saut Flai, long Westen Provins, long sanapim namba wan dia fam long kantri.

Wok long dispela projek i bin kirap las yia long Kautru viles long Saut Flai rijen.

Wanpela dia fam i sanap pinis long dispela ples, na ol i gat 7-pela dia nau i stap.

I gat planti ol wel dia i stap long bus, OTDF i wok long traim holim ol bai ol i ken lukautim ol.

Ples Kautru i kisim luksave olsem viles bilong kirapim dispela wok bisnis.

Aninit long progrem, OTDF bai wok wantaim Viles Plening Komiti bilong Kautru long strongim ol sevis bilong helt, edukesen, agrikalsa na rot bilong kisim winmani.

Ol arapela ples i laik



strongim ol sevis bilong ol, i ken kam insait long dispela progrem.

OTDF bai mekim wankain progrem wantaim ol arapela viles i stap insait long Ok Tedi Komyuniti Main Kontinuesen

Agrimen (CMCA).

Las yia, OTDF i kisim wanpela dia fama bilong Australia i kam na halivim ol, wantaim ol pipel bilong Kautru, long bringim bisnis bilong dia faming i kamap tru.

Las wik tasol, OTDF i go pas long ol mit prosesing saveman bilong Australia na Fubilan Catering Sevises Limit long go lukim fam na statim wok long wanpela prosesing fasiliti o bilding.

PNG Bisnis Koles pinisim tupela sumatin long brukim skul loa

DISIPINARI Komiti bilong Kokopo Bisnis Koles long Is Nu Briten i saspenim 80 sumatin, na namel long en, ol i pinisim tupela long pinis olgeta long skul.

Dispela disisen i bin kamap bihain long ol i painim ol sumatin i bin kros na pait na brukim nabaut propeti bilong skul, insait yet long domitori bilong ol man sumatin.

Tupela sumatin em ol seken yia sumatin.

Em i no namba wan taim Bisnis Koles i bungim dispela ol trabel.

Sampela yia i go pinis, wankain hevi i bin kamap, we tupela sumatin i bin dai, na ol sumatin yet i bin kukim administresen bilding long dispela kain pasin bilong dring spak.

Sinia Inspekta David Yapu, Is Nu Briten Polis Komanda, na tu, Siaman bilong Kokopo Bisnis Koles Disiplinari Kaunsil, i tok mekimsave olsem i go long tupela ol i pinisim i bihainim ol wok painimaut bilong ol olsem, husat ol yangpela i go long koles i mas bihainim ol loa i stap long bikpela skul olsem



SME SUMMIT MADANG 2013



Oi poto: Neville Choi



OI PNG bisnis laikim moa sapot

Neville Choi i raitim

BIKPELA moa luksave na kliarim rot bilong strongim ol liklik na namel sais bisnis long Papua Niugini em i bikpela askim i kam long ol PNG bisnis manmeri.

Moa long 400 bisnismanmeri, savemanmeri, na ol arapela lida i bin sindaun na paitim tok long wanpela tripela de kibung tok Madang las wik, na ol i laikim gavman i mas givim moa luksave long strong bilong ol liklik bisnis bilong holim na strongim kantri.

Insait long tripela de sindaun, kibung i lukim tok pait na strongpela tingting long kirapim bek lista i tok makim wanem ol bisnis em bilong ol Papua Niugini manmeri tasol long bosim; wanem rot i stap long sait bilong ol loa long kantri long strongim ol asples bisnis; strongim

skulim bilong bisnis na we bilong kirapim bisnis insait long ol skul bilong yumi; na long luksave long wanem samting yumi olsem kantri i mas holim na lukautim gut taim mipela i laik kamapim ol tok-wanbel wantaim ol bikpela bisnis bilong ol arapela kantri.

Madang Deklaresen na Komyunike, em i nem bilong pepa i karim 21 bikpela askim kibung i kamapim, na dispela pepa, em ol i givim i go long han bilong Prait Minista Peter O'Neill yet las wik Trinde.

Ol bikpela belwari bilong ol bisnis manmeri long PNG tude, i sut long:

- Bikpela mani ol i save lusim long lukautim bisnis;
- Strongpela resis ol i save kisim long ol intanesenel kampani;
- Nogat inap tok stia na halivim bilong strongim save bilong ol

long wok bisnis; na

- Moa luksave long SEM sekta, wantaim moa rot bilong ol PNG bisnis long kisim mani halivim bilong groim bisnis bilong ol.

Planti long ol bisnis manmeri husat i bin kamap long dispela SME Samit o kibung long Madang, em ol i bin kisim halivim bilong Nesanel Developmen Benk (NDB) long kirapim ol.

Nau ol bisnis i pasim tok long askim gavman i mas givim moa luksave long wok NDB i mekim long strongim SME sekta, wantaim moa mani i go long NDB long karimaut ol wok bilong en neks yia.

Ol i laikim bai gavman i mas skelim K200 milian olgeta yia inap long faivpela yia i kam, aninit long nesanel baset.



TOKTOK STRONG: Presiden bilong PNG Indijines Bisnis Kaunsil, Sir Nagora Bogan, na Madang Gavana Jim Kas i go pas long kisim tingting bilong ol bisnis manmeri bilong Mo-mase rijen pastaim long ol i bungim tok long Madang Deklaresen na Komyunike.

Poto: Neville Choi

O'Neill givim tok orait na luksave

Neville Choi i raitim

PRAIM Minista Peter O'Neill i givim pinis tok orait bilong en na kabinet bilong en, long sampela long ol askim i kamaut long SME (Smol na Midium Enteprais) Samit las wik.

Bihain long em i kisim 21 poin Madang Deklaresen na Komyunike long Gavana bilong Madang, Jim Kas, Mista O'Neill i givim bekim long sampela ol dispela samting:

- Em i tok yesa long gavman i mas kamapim wanpela Nesanel Konten Lejislesen o loa bilong olgeta kain sekta i kamapim olgeta ol gavman projek, ol join vensa, o ol gavman agrimen;
- Em i tok yesa olsem i mas i gat moa bisnis skul i mas go insait long skul kurikulum bilong kantri, olsem wanpela ko subjek, wankain olsem mets, saiens, na inglis. Wankain luksave bai go long

ol tesari na TVET program. Mista O'Neill i tok dispela bai stap insait long nupela kurikulum we nesanel dipatmen bilong edukesen bai kamap stat long neks yia;

- Em i tok wanbel olsem kos bilong wok bisnis long kantri, em i antap tumas, na i no givim sans long ol bisnis long groa. Long wankain taim, em i tok luksave olsem bai ol Stet On Ejensi o SOE, i mas i gat senis, bai ol bisnis i

noken peim tumas mani long kisim ol bikpela gavman sevis;

- Em i tok yesa long gavman, aninit long Takis Riviu wok program bilong en, long givim sampela kain sapot long SME sekta wantaim ol takis malolo;

• Em i tok luksave tu olsem ol lis bilong graun bilong gavman, bai mas tambu tru long go long han bilong ol arapela manmeri o bisnis na kampani bilong ausait.



SAVE LONG BISNIS: Prait Minista Peter O'Neill i save long ol hevi bilong wok bisnis, na em i luksave long strong bilong SME sekta.

Bird tokaut long ol hevi bilong ol liklik PNG bisnis

LOKOL Wewak na Madang bisnisan, Allan Bird, i laik bai ol PNG bisnismanmeri mas kisim moa stia na halivim long strongim save bilong ol long bisnis.

"Bipo, em i hat tru long ol manmeri bilong yumi long kisim stia na halivim long kirapim bisnis. Mi na meri bilong mi, mipela i gat bisnis, tasol mipela i no kisim wanpela halivim long we bilong kirapim. Mipela i brukim bus i kam, na mipela i kisim save. Tasol em i no isi wok," Bird i tokim SME Samit long Madang las wik.

Em i tok namba bilong ol nupela wok long kantri, i no makim developmen i wok kamap.

Long dispela as, em i tok SME sekta, em i ples we moa wok i ken kamap, bikos em i sekta we planti ol liklik PNG manmeri i ken go insait long kamapim ol dispela wok.

Mista Bird i tok ol PNG manmeri yet i ken bosim dispela sekta na strongim i go long gutpela taim bihain, sapos ol i senisim tingting.

"Namba wan bikpela



YUMI GAT STRONG: Namba wan birua bilong yumi em ol pipel bilong yumi yet. Yumi mas senisim tingting – Bird.

birua bilong yumi, em ol pipel bilong yumi yet. Pasin bilong fiskal disaplun, em yumi nogat. Taim yumi gat bisnis, kwiktaim tru bai yumi tok olsem nau yumi bikmanmeri, na yumi bai yusim mani yumi gat long amamas na dring bia. Dispela i mas senis. Yumi mas tingting i go long bihain taim, na strongim sindaun bilong yumi tude.


"Ol liklik PNG bisnis, em ol i save holim strong na lukautim pipel bilong dispela kantri. Tasol yumi yet i mas strongim yumi yet long lukautim ol bisnis

yumi kirapim," Bird i tok.

Tasol em i tok tu olsem isi isi, yumi wok long senis.

"Nau yumi gat Vision 2050. Tasol dispela i no inap long kamap nating. Yumi mas senis yumi yet, bai yumi ken bringim senis long SME sekta."

Mista Bird i tok ol hevi i stap yet, em nogat inap save long mekim wok bisnis, nogat strongpela wok bilong gavman long was gut long ol bisnis i no bihainim loa, na pasin bilong tingting long sotpela taim tasol.





Wantok

Advertise your Business right here!!

We deliver your message right to the remote areas of PNG where others don't go.
Wantok Niuspepa is your medium to communicate your business now.

Niuspepa Bilong Yumi Ol PNG Stret!!

Call the Advertising team on,
Ph: 3252500 Fax: 3252579 or
Email: advertising@wantok.com.pg or
Website: www.Wantokniuspepa.com



Ramu NiCo HSE toksave long wok bilong salfa marasin

PLANTI pipel i wok long kamap wantaim kain kain paol tingting olsem salfa em Ramu NiCo i save yusim long kisim nikel na kobalt long rifaineri bilong en long Basamuk em samting nogut tru.

Olsem na ol opisa bilong Helt, Sefti na Envairomen (HSE) Dipatmen bilong Ramu NiCo i bin mekim sampela aweanes long ol local komyuniti long Basamuk na ol arapela ples klostu long stretim tingting bilong ol.

Dispela toktok bilong salfa i bin go bikpela bikos sampela lain NGO i wok long go raun na givim planti giaman stori long ol pipel.

Long las wik tasol Minista bilong Envairomen na Konsevesen, John Pundari i bin mekim wanpela lukluk raun bilong em i go long Basamuk Rifaineri bilong Ramu NiCo Menesmen (MCC) Limited, na em i luk-save olsem Ramu NiCo i wok bihainim lo we Gavman bilong PNG i putim kamap. Na Ramu NiCo i no abrusim ol lo.

Minista Pundari i tok ol NGO na ol lain bilong ol i no ken givim giaman stori tumas long ol pipel.

"Salfa" em wanpela kemikel o marasin we i gat yelopela kala, nogat teist bilong en na em save stap plenti tru lo graun na wara olsem solwara.

Salfa em ol i save kisim lo ston na solwara tasol planti tru istap long kaikai olsem wine fruit, kiau, bean, meat na ol narapela protein kaikai.

I gat planti wok bilong salfa kemikol, we planti i save yusim long fektori long wokim ol samting olsem fetelaiza o marasin bilong mekim kaikai gro gut long gaden, bateri wara bilong kar, yusim long wokim taia bilong kar, na ol i save yusim salfa long wokim marasin long putim long sua na sigirap bilong skin olsem dendraf, na yusim salfa tu long wokim marasin long pekim ol stua kaikai na frut na kaikai olsem poteto sips.

Salfa i gat wok tu em ol lain long fektori i save yusim long wokim ol samting ol man i save laikim olsem wain bilong dring na tu yusim long mekim teist bilong wain i kamap gut.

OI HSE opisa bilong Ramu NiCo i givim kliat tingting long pipel long

ol viles na hauslain klostu long Basamuk long toktok na infomesen long rot ol i save yusim salfa.

Dispela em bikos planti kain kain toktok na giaman stori i wok long kamap olsem salfa i ken bringim sik long ol pipel na tu win nogut bilong salfa i wok long bagarapim ol gaden kaikai na ol lip bilong diwai na ol gaden kaikai.

Sampela bikpela toktok ol HSE opisa i bin givim long ol lokal pipel em olsem:

Smel bilong salfa i no inap kilim man indai.

Long wol rekot nogat wanpela man i bin dai long smel bilong Salfa.

Long givim tingting long ol pipel long wok bilong Ramu NiCo Rifaineri long Basamuk, ol HSE opisa i bin toktok long sait long monitoring o sekim win bilong salfa i go aut long fektori. Ol opisa i tokaut olsem long sait long lod komisin o stat long prodaksen taim i kam inap nau, kemikol ol i kolim salfadaioxaide na naitrozen go aut nau tasol bai ino nap givim hevi long ol pipel.

Inap lo stat bilong lod komisin ikam nau ol masin ino ridim ol birua I kamap long salfa na dispela I min olsem Envairomen dipatmen i sekim olsem mak bilong ol win i go aut i stap long makim bilong stendet we Gavman bilong PNG, aninit long lo bilong Dipatmen bilong Envairomen na Konsevesen (DEC) i kamapim.

Bikpela samting ol pipel bilong PNG i mas save em kain bikpela Projek olsem Ramu Nikel i bihainim mama lo na oltaim Gavman wokman i save sekim wok bilong Ramu Nikel long mekim olsem em i bihainim lo oltaim.

Long las wik Ramu NiCo i bin pinisim selebresen bilong 'Sefti na Envairomen' mun we i lukim kampani i kamapim planti ol ektiviti long makim rot long lukautim gut sefti na envairomen.

Siaman bilong Ramu NiCo Menesmen (MCC) Limited, Zhao Shimin i mekim strongpela toktok tru olsem Ramu NiCo mas oltaim sanap long sait long sefti long olgeta wok operesen bilong en na bihainim lo we DEC na Gavman i putim pinis long em i mas bihainim.



Aweanes long salfa long Kulilau viles long nait.



OI HSE opisa mekim sekim win wantaim masin.



Sip i kam lusim salfa long Basamuk Pot.

RAMU NICO **Ramu NiCo redi long givim**
 Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.
 Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.
OI dispela namba i soim kliat mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

Lokol memba bringim sevis yet long Unggai Bena

Sape Metta i raitim

OL sios mama na yut grup na ol lokel pipol long wanpela ilektoret long Isten Hailans i wok long lukim planti senis na developmen i wok long kamap long las tenpela yia, long wanem, lokel memba bilong ol i wok hat tru na em i no stop long bringim ol sevis i go long ol.

husat i bin kisim twenty tausen kina (K20,000) halivim i kam long lokel memba bilong ol Benny Allan long 2012 em Yasie Kopi Produsas.

Na papa bilong dispela lokel kopi kampani Thomas Yasie i mekim yus long dispela sapot mani na kamapim narapela seventi tausen kina (K70,000) na i bin amamas long dispela wok, i bringim ripot i go bek long Mista Allan long

wanem tok amamas sere-roni we i bin kamap long Magitu hauslain long Bena Bena tupela wik i go pinis.

Long dispela 20,000 – Yasie Prodyusa i kamapim K90, 000 insait long wanpela yia tasol na Mista Allan i bin amamas tru long ripot olsem halivim em i givim i no go nating – em karim bikpela kaikai tru. Na planti ol lokel lain long dispela ples i benefit long dispela halivim.



YES – YU KEN MEKIM: Lokel kopi fama na papa bilong Yusie Kopi Produsa logn Magitu long Bena Bena distrik, Thomas Yasie, i poinim pinga long ol arapela fama olsem ol i ken mekim sapos ol i yusim stret ol halivim mani ol lida na memba i givim ol. Em i givim ripot bilong mani ol i yusim i go long memba Benny Allan tupela wik i go pinis. **Poto: Sape Metta**

Ol meri bai go pas long bosim Goroka So

Sape Metta i raitim

MUV go long sait long man - em i taim bilong ol meri long i go pas nau long lukautim ol samting long Goroka na Isten Hailans.

Na wanpela bikpela samting ol meri bai i go long lukautim long dispela yia, em Goroka So Sosaeti. Na ol i tokaut na mekim dispela klia long taim ol i bin opisel lonsim 57th Goroka So, 2013 long Bird of Paradise Hotel long Fraide wik i go pinis.

Isten Hailans Provins Gavman aninit long lukaut bilong gavana Julie Soso Akeke bai tekova na i go pas long lukautim So Sosaeti long dispela yia na ol yia i kam bihain. Sosaeti i bin operet olsem wanpela independen ogenaisesen aninit long lukaut bilong olupela presiden, Gideon Samuel long las faipela yia.

Misis Akeke long taim bilogn lonsing i tok, olsem lidameri bilong provins, em i luksave long gutpela wok bilong ol meri na em i amamas long makim ol long go pas, lukautim na ranim sosaiti wantaim ful sapot bilong em na provinsel gavman.

Lokel bisnismeri Karen Hargreaves i bin kirap nogut long taim Misis Akeke i makim em long kamap olsem nupela presiden na Sophia Okuk long wok olsem eksekutiv opisa bilong sosaiti.

Misis Akeke i tok, gavman bilong em i tekova long ol operesen bilong so, long wanem, kain samting em bilong ol pipol long provins, olsem na provinsel gavman i mas kisim i go pas long lukautim, fandim na tekim onasip long en.

Na long ranim so, menesmen na ol komiti bai nidim fand, olsem na gavana

Akeke i komitim wan handret twenty tausen kina (K120,000) i go long fandim na ranim so long dispela yia. Dispela i mekim provinsel gavman i kamap olsem mesa sponsa bilong so.

Misis Akeke i amamas na tok tenkyu tu long National Gaming Control Board, SP Brewery, Coca Cola Amatil, Alekano Savings & Loans Society, Trukai Rice, BSP Bank, ANZ Bank, Coffee Industry Co-operation (CIC), Ramu Agri Industries, Explorers International, Nowek Limited, Niugini Fruit Company, National Agriculture Research Institute(NARI), GK Guest Haus, Coral Sea Hotels na Bintangor Trading husat em ol ko-sponsa long 2013 Goroka So.

Misis Akeke i mekim komitmen na tok promis tu long givim tu handret fifti tausen kina (K250,000) i go long fandim so long yia 2014 i kam bihain.



MERI PAWA: Gavana bilong Isten Hailans Julie Soso Akeke (lephan) i welkamim nupela presiden bilong Goroka So Sosaiti, Karen Hargreaves, na lukluk i stap long namel em Eksekutiv Opisa Sophia Okuk. Dispela ol meri bai go pas long lukautim Goroka So Sosaiti. So long dispela yia bai kamap long 13th - 15 Septemba, 2013. **Poto: Sape Metta**

Bung long sanapim sios sekreteriet

Veronica Hatutasi i raitim

TUPELA de nesenel konsaltetiv bung i bin kamap long Mas Gels Risot ausait long Mosbi long toktok long kirapim wanpela Sekreteriet insait long Komyuniti Developmen na Rilijen Dipatmen we bai makim ol sios na wok patna wantaim gavman long sevim pipel.

Olsem dipatmen we bai karimaut disisen bilong gavman we em i laik lukim bai kamap, Dipatmen bilong Komyuniti na Rilijen i statim ol wok bilong kirapim Sekreteriet.

Wok bilo ng Sekreteriet

em bilong redim ol taim bilong toktok namel long ol sios na ol narapela stekholda long nupela patnasip wok namel long ol sios na gavman.

Dispela bung i lukim ol bikman i makim ol sios long dispela kantri, ol bikman bilong Nesenel Plening na Monitaring na ol lain bilong Komyuniti Developmen na Rilijen Dipatmen em Minista Loujaya Toni i go pas long en i sindaun long tupela de bung ya.

Wantaim het tok, "Gavman na Sios i wokbung long senisim komyuniti", ol lain long bung i bin givim ol tingting bilong ol na dispela ol tingting ol i bungim wantaim long glasim na skelim

long kamapim ol gaidlain bilong sekreteriet.

Dispela bai kamap bihain long ol i wokim ol narapela rijinel woksop long kantri.

Tasol olgeta samting i mas redi long neks mun tasol, Ogas.

Bung i harim olsem O'Neill/Dion Gavman i gat strongpela politikel komitmen o tingting long wok wantaim ol sios na sapotim ol long kisim ol bikpela sevis i go aut lon g pipel.

Olsem na gavman i laikim bai Komyuniti Developmen na Rilijen Afeas i mas sanapim wanpela Sekreteriet na givim mani sapot we bai lukautim ol samting i karamapim ol sios long en.



MAS GELS SIOS FORUM: Ol lain i stap long tupela de Nesenel Konsaltetiv sios forum long sanapim sekreteriet bilong makim ol sios long wok bung gut wantaim gavman. **Poto: Veronica Hatutasi**

Soka bilong Kranket Ailan i no liklik

...Gutpela stap isi ples

Mathew Yakai i raitim

YU sanap long Madang Risot na lukluk i go hapsait em bai yu lukim wanpela ailan.

Dispela em Kranket Ailan. Maski long paul na ting olsem em Manam Ailan, na bai i gat maunam Airap, or Karkar Ailan na "Island of no return."

Kranket Ailan i gat nem tu ya. Planti bilong mipela ol kam man na meri save stap long hap, rentim haus na kisim bot olgeta moning i kam long Madang na apinun go bek.

Taim Dallman Pasis i raf o solwara i kros, mipela ol hailans i save kaikai tit na pre long tingting olsem bot noken kapsait.

Wanpela lida man long hap, John Guluman i tok, ailan ya i gat mak long 3,000 pipel long en na i stap ananit long Abenob Lokol Level Gavman (LLG).

Planti bilong dispela populesen em ol kam-man olsem dispela nius man. Ol papa graun stret em mak long 1,000.

Kranket Ailan i gat 10-pela hauslain o klen, na tupela bikpela wanpesis; Mitibog na Graged. Tupela i gat wanpela kalsa, pasin tumbuna, tok ples na olgeta samting i wankain stret. Tasol insait long ol dispela, ol yet i save marit i go kam.

Yangpela lida man, Mista Guluman i tok Kranket Ailan em i "peaceful" o ples i gat stap isi long en stret, nogat birua pasin na olgeta manmeri i save gat gutpela pasin na bel.

Dispela em i tru bilong wanem, sapos i go long hap ples bilong Madang olsem LBC, Yabob, MTC na ol narapela hap bai i gat kainkain birua pasin. Kranket em naispela ya!

"Na yu save tu olsem Madang taun i stap antap long graun bilong mipela," John i askim mi. Mi bekim wantaim het i go daun na em i lap.

"Yu lukim ol dispela yangpela man na meri ya, ol nogat futja bilong ol. Nogat skul, nogat save long painim wok. Ailan i nogat graun na risos, tasol God i blesim mipela na mipela i save gat kaikai olgeta taim ya," John i tokim mi.

Dispela em tru bilong wanem, taim mi bin traim long rentim haus long Kranket Ailan, wanpela wanwok meri i tok pilai long mi olsem mi bai karim gaten kaikai i go long ailan.

Bihain mi painim aut olsem taim mi go long Ailan bai mi marit long hap na wok mani long baim kaikai bilong hauslain bilong meri bilong mi. Em nogat samting...meri



Guluman i givim nambawan prais tropi long kepten bilong Pres 36.



John Guluman i toktok long ol pilai man long amamas long gem na noken kamapim trabel.



Ol sapota i amamas long gem tu.

na tambu em lewa ya. Wanem taim em kam long wei bilong em, orait yumi lukim.

"Nogat planti bilong ol yut long Kranket i wok long Madang. Mipela i no kisim bikpela benefit tasol graun bilong mipela em mipela givim long gavman na tude, Madang taun na PNG i benefit," John i tokim mi.

Taim mi harim nek bilong

John, mi tingim gen long ol narapela taun insait long PNG we ol papagraun i save kamapim planti birua tasol ol lain Kranket i nogat kain tingting stret.

John i bin wokim ol dispela stori long Sande taim mitupela i lukim wanpela soka tonamen we em i kamapim ananit long nem bilong em yet, "John Guluman Cup Tonamen".



John i mekim opisel kik op.



Ol pilai bilong Pres na Iga Batas i sekan bihain long gem.

Mi lukluk long ai bilong em, man ya i gat fokas long bihain taim bilong Kranket Ailan.

Bel bilong em i stap long ol pipel bilong em.

Solwara bilong Dallman Pasis i lukluk long bel bilong em na silip sori long dispela apinun, na tu san i go daun na mekim Astrolobe i slip sori.

John i kamapim dispela

tonament long narapela wik i go pinis na pinis long las Sande long bungim olgeta yut long soim kala bilong ol long soka na volibal na noken kamapim birua long spak brus na yawa.

Long dispela 2-pela wanpesis long Ailan, i gat 10-pela klen na wanwan klen i kamap wantaim 1-pela soka tim na 1-pela volibal tim. Total olsem 10-pela soka tim

na 10-pela volibal tim i salens insait long displa "John Guluman Tonamen".

Strongpela tim bilong soka, Pres 36 Wan i winim dispela Cup wantaim 3-pela point na Iga Batas Wan i lus wantaim 1-pela poin. Olsem ol i save tok ha, wanpela i mas win na wanpela i mas lus. Na wanbel i stap long dispela.

John Guluman i amamas tru long ol pikinini na brata susa bilong em i bin kamapim wanpela gutpela tonamen long dispela ailan na tok aut olsem em bai kamapim wankain long Septemba 16.

"Gem i no pinis. Wankain tonamen bai kamap long Septemba 16. Dispela em gem bilong yumi Kranket na yumi mas amamas na pilai olsem ol pikinini Kranket stret," John i tok.

John i gat bikpela tingting olsem sapos ol pikinini Kranket i nogat save na skul orait, ol i ken kamapim gutpela sindaun bihain taim long spots.

John i sanap tu long Abenob LLG Presiden sia na em i resis wantaim ol narapela moa long 10-pela man.

"Mipela i gat pawa, wara, na skul tasol i gat planti samting yumi nidim. Taim senis na Kranket tu i mas senis na tude em i no taim bilong paul nabaut," John i tok.

Olgeta de na nait taim ol Kranket lain i kirap long bet, ol i save lukim ol bikpela mama bilong ol sip i save ron kam insait long pasis bilong Dallman na go tanim teil long Bilia Ailan na so long Madang Haba. Ol bikpela turis sip tu save kam sua.

Taim Kranket Ailan i lukluk i go ausait tasol, ol i lukim Madang Risot i stap sambai na ol kainkain wait manmeri na blek manmeri i save kam slip long hap.

Ating ol i lukluk i go hapsait na save tingting olsem dispela Ailan i gat ol turangu man na meri i stap. Tasol ol i no save olsem Kranket Ailan i toktok na Madang stap.

Na sapos olgeta lida man na meri bilong Ailan Kranket i gat wankain tingting olsem John Guluman, bai tru Papa God, Kranket tu bai senis.

No moabeta Madang Provinsel Gavman i luk save tude long komitmen Kranket Ailan i mekim na givim wara saplai, na sampela luksave long plen bilong Ailan.

Ating gavman tu i mas sapotim tingting bilong John Guluman long sait bilong spots bilong ol yut, na ol i no ken kamapim ol birua nambaut long yawa na spak brus.

Ol yut ya ol i laik pilai soka olsem ol yut bilong narapela ples bilong wanem soka bilong Ailan Kranket em i no liklik – taim gem i stat, Dallman Pasis i save slip sore tu ya!



SPOTS DRO RAUN 18

Fraide: Julai 12, 2013

Suncorp Stadium



Broncos V^s Sharks



Sarare: Julai 13, 2013

Parramatta Stadium



Eels V^s Panthers



Sande: Julai 14, 2013

ANZ Stadium



Bulldogs V^s Storm



Mande: Julai 15, 2013

Townsville Stadium



Cowboys V^s Eagles



Trinde: Julai 17, 2013

ANZ Stadium



NSW V^s Queensland



Bai: Rabbitohs, Roosters, Knights, Titans, Raiders, Warriors, Dragons, Tigers

Tupela yia wokabaut long bungim 2015 Pasifik Gems

Frieda Sila Kana raitim

FONDE 4 Julai, 2015 i makim tupela yia long wokabaut bilong i go long bungim 2015 Pasifik Gems na Minista bilong Spots na 2015 Pasifik Gems, Justin Tkatchenko i lonsim dispela de long Jack Pidik Pak long Nesenal Kapital Distrik.

Staman bilong 2015 Pasifik Gems Atoriti, Mista David Conn i tok long dispela de bilong selebretim 2 yia stret long go bungim de bilong opim ol Pasifik Gems long 4 Julai 2015, olsem em i laik tok tenkyu long ol meja sponsa bilong Gems, na ol arapela lain i wok long sapotim dispela wok olsem ol polis ben na ol nius lain.

"Yumi mas soim ol brata bilong yumi long Pasifik olsem yumi bai kamapim wanpela naispela na gutpela Pasifik Gems stret na tu yumi mas tok amamas long ol lain bilong yumi long resis na pilai na yumi hop olsem ol bai kisim ol top medal tasol," Mista Conn i tok.

Mista Conn i tok tenkyu long sapot bilong NCDC na em i luksave long Siti Menesa, Leslie Alu, i bin stap long dispela taim tu. Em i tok Gems komiti bai i save bung long miting olgeta wanwan mun na em i kostim tiam na mani tasol



Kauntim long TV Skrin lons bilong 2 yia sponsasip bilong 2015 Pasifik Gems.

olgeta lain i amamas long givim taim na save bilong ol long dispela gutpela samting.

"Ol gems i stap long gutpela han bilong CEO, Peter Stewart, em i man i gat moa save long ronim ol kain bikpela gems olsem Olimpik, Komonwelt Gems na Saut Pasifik Gems na yumi bai kamapim tru wanpela kain Pasifik Gems we bai ol man i tingim long, longpela taim yet bihain," Mista Conn I tok.

"Em i bikpela moa i winim Komonwelt Gems na PNG i gat bikpela ona long go pas long dispela. Yumi bai i gat K1 bilian infrastraksa divel-

opmen insait long Pot Mosbi bihain long gems i pinis na dispela siti bai kamap wanpela primia siti long Pasifik. Dispela bai ol i kolim olsem tumbuna stori bilong Pasifik Gems. Bihain bai olgeta Papua Niugini i ken yusim ol dispela long pilai kainkain spot." Em i tok moa.

"Yumi laikim olgeta lain i kam bai tok, man Mosbi em i gutpela ples stret ya. Tasol mipela laikim yupela olgeta pikinini, i go long bubu long mekim gut dispela taim. Mipela laikim ol dispela spot man na meri na ol opisel na lain bilong ol i go bek wantaim gutpela bel na

laikim long ol pipel na ples bilong yumi." Mista Conn i tok.

Las taim long 1991 taim ol lain bilong yum iron resis na i winim planti medal. Em welkamim Ogenaising Komiti long wok wantaim ol komyuniti long siti long wanem yumi nidim 3,000 volantia.

Tok Bek So host, Roger Hau'afa i bin Masta ov Seremoni long dispela lonsim na em i tok, em i bikpela blesing long stap long witenesim tupela taim Pasifik Gems i kamap long PNG, nambawan long 1991 na nau 2015 bai nambatu taim.

Raun 17 Poin Leda

Pos	Tim	W	B	L	D	Pts
1.	Rabbitohs	14	1	2		30
2.	Roosters	12	1	3	0	26
3.	Storm	11	1	4	1	25
4.	Sea Eagles	8	2	6	1	21
5.	Sharks	8	2	7		20
6.	Knights	8	1	8		18
7.	Panthers	7	1	8		18
8.	Titans	8	1	8		18
9.	Bulldogs	8	1	8		18
10.	Raiders	8	1	8		18
11.	Warriors	7	1	9		16
12.	Cowboys	6	1	10		14
13.	Broncos	6	1	10		14
14.	West Tigers	6	1	10		14
15.	Dragons	5	1	11		12
16.	Eels	3	2	11		10

KWINSLEN i makim tim lain ap bilong ol long kisim ol Blues long namba 3 gem bilong Stet ov Orijin we bai kam long ANZ Stadium long Trende i kam. Dispela lain ap bilong i nogat wanpela senis olsem long gem 2.

Kosa Mal Meninga i no mekim wanpela senis long wanem i nogat bagarap i kamap long ol pilai husat i bin pilai long gem tu we skoa em 26-6 long Suncorp Stadium.

Ol Kwinslen bai stap long wankain gem plen bilong ol long tingting long kisim dispela stret siris long namba 8 taim, ol Blues i mekim wanpela senis long bagarap long lek bilong Jarryd Hayne we ol kisim James McManus.

Dispela senis bilong ol Blues tu bai lukim sampela biknem pilai bilong bai no inap stap long statim lain ap long wanem sampela kisim liklik sik.

Maroons nau bai go long kemp long strongim fitness bilong ol redim gem plen bilong ol long daunim Blues.

Johnathan Thurston bai lukluk long pilai strong moa bihain long em mekim bikpela senis long namba tu gem we ol bin winim Blues 26-6. Daly Cherry-Evans bai pilaim pat bilong em taim em kam aut long bens.

Jacob Lillyman ol makim em long 18-man skwad long dispela namba tri gem sapos wanpela kisim bagarap.

Kwinslen tim bilong namba tri gem em,

1. Billy Slater - Melbourne Storm
 2. Darius Boyd - Newcastle Knight.
 3. Greg Inglis - South Sydney Rabbitohs
 4. Justin Hodges - Brisbane Broncos
 5. Brent Tate - North Queensland Cowboys
 6. Johnathan Thurston North Queensland Cowboys
 7. Cooper Cronk - Melbourne Storm
 8. Matt Scott - North Queensland Cowboys
 9. Cameron Smith (C) Melbourne Storm
 10. Nate Myles - Gold Coast Titans
 11. Chris McQueen - South Sydney Rabbitohs
 12. Sam Thaiday - Brisbane Broncos
 13. Corey Parker Brisbane Broncos
 14. Daly Cherry-Evans - Manly Sea Eagles
 15. Ben Te'o - South Sydney Rabbitohs
 16. Matt Gillett - Brisbane Broncos
 17. Josh Papalii - Canberra Raiders
 18. Jacob Lilly man - New Zealand Warriors
 19. Will Chambers - Melbourne Storm.
- Kosa - Mal Meninga.

FRIDAY 12 JULY

7:55PM
SUNCORP STADIUM

SATURDAY 13 JULY

5.30PM
PARAMATTA STADIUM

WEDNESDAY 17 JULY

8.10PM
ANZ STADIUM, SYDNEY

LIVE GAME CALLS

ALOTAU 107.1	BUKA 100.8	KANKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NUC 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TASUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAU/SULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONETTA 100.5	TELEFOMIN 100.3	WEWAK 100.8

Ol Spot Eksen poto long wiken...




Ol Poto Nicky Bernard.

Tahiti hap bek na kika i redi long kik.



PNG Kriket tim wantaim Trofi.



Namba tu kepten bilong PNG Pukpuk i putim bal long lek bilong em taim Solomon Ailan pilai i traime long takolim em.



FIFA skul kanivol i pulim ol yangpela meri.



Soka eksen long Bisini.

- Weekend Sports Draws -

Digicel Cup Round 14

Home	Away	Venue
SUNDAY, 14 JULY		
SNS Vipers	vs. Snax Tigers	Port Moresby
Bintangor Lahanis	vs. Enga Mioks	Goroka
Agmark Gurias	vs. Gulf Isapea	Kokopo
Wamp Nga Eagles	vs. TNA Lions	Mt Hagen
Hela Wigmen	vs. Mendi Muruks	Mendi

RESULTS

Vipers 14 Muruks 12,
Gurias 28 Lahanis 4,
Mioks 30 Tigers 6,
Wigmen 20 Eagles 10,
Lions 26 Isapea 20

LADDER

	P	W	D	L	F	A	Pts
Tigers	13	8	2	3	246	178	18
Lahanis	13	8	1	4	233	218	17
Mioks	13	8	0	5	314	160	16
Gurias	13	8	0	5	311	188	16
Vipers	13	8	0	5	292	216	16
Wigmen	13	5	2	6	215	242	12
Lions	13	4	0	8	198	348	10
Isapea	13	4	1	8	242	306	9
Eagles	13	4	1	8	198	313	9
Muruks	13	2	3	8	171	231	7

TOKSAVE: Salim ol spots dro bilong yu kam long Feks; 325 2579, e-mel; bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.

Vipers redi long Tigers

Nicky Bernard i raitim

POT Mosbi Viper bai holim namba tu pilai bilong em long hom graun bilong em long Pot Mosbi dispela wiken tai mol bai bungim Lae Tiger.

Vipers i winim gem bilong em long las wiken taim ol kism Muruks long PRL, dispela gem bilong tupela bin strong tru na tupela tim i pilai wankain pilai na mekim skoa bilong tupela i stap klostu 14-12.

Vipers i gat ol gutpela na bikipela fowod, dispela bai helpim ol long stopim ol Lae Tiger we fowod bilong ol i strong na tu ol gat planti spit.

Lae Tiger bai pilaim ol bek lain bilong ol long wanem ol bek lain bilong ol i gat spit na tu ol save mekim wok olsem ol fowod tu.

Dispela pilai bai pulim planti sapota bilong Viper long sapotim tim bilong ol, na em taim tu long ol strong bilong Tiger long wanem planti pilai bilong ol i stap long saspen.

Lae Tigers i lus long Mioks long pilai bilong ol long Wabag long wiken i go pinis, dispela i kamapim bikipela pait namel long ol sapota.

Vipers, bai lukluk long putim ol biknem pilai bilong



OK Tedi kamap platinum sponsa bilong 2015 Gems

OK Tedi Maining Limited nau i go insait long ol lain i sapotim PNG long rere long ronim 2015 Pasifik Gems.

OTML na Pasifik Gems Oganaising Komiti i sainim wanpela sponsasip agrimen long Fonde, 4 Julai long Pot Mosbi. Ol lain i bin sainim dispela agrimen em OTML Menesing Dairekta na Sif Eksekutiv Ofisa, Mista Nigel Parker na 2015 Pasifik Gems Limited Sif Eksekutiv Ofisa Mista Peter Stewart.

Sponsasip bilong OTML, main bilong painim kopa na gol long Westen Provins i kamap Platinum Sponsa bilong 2015 Pasifik Gems.

OTML Menesing Dairekta na CEO, Nigel Parker i tok, "Pasifik Gems em i bikipela samting tru i kamap long PNG na Ok Tedi em i gat bikipela amamas long pas wantaim Pasifik Gems Oganaising Komiti long go pas long dispela intanesen kibung long PNG, na tu long helpim Papua Niugini Spots Federesen na Olimpik Komiti (PNGSFOC) long

rereim ol pilai bilong PNG na ol spotsman na meri husat bai pilai insait long dispela bung bilong pilai."

Mista Parker i tok maski ol prais bilong ol metel i go daun na putim hevi long OTML wantaim ol arapeal kampani long maining industri, Pasifik Gems em i bikipela samting tumas long PNG na em i nidim olgeta sapot long em bai kamap gut stret.

"Pasifik Gems bai salim stori bilong PNG olsem em i wanpela ples bilong invesmen. Em bai putim mak bilong dispela kantri i go antap moa long sait bilong turis sekta, na em bai putim ples klia olgeta strongpela lain bilong ron resis na ol spotman na meri husat pas-tasol i no save stap ples klia tumas long wol. Bai yumi tok moa olsem wanem, 2015 Pasifik Gems bai bringim moa gutpela samting long dispela nesen," Mista Parker i tok.

Em i tok, long ol dispela as tasol, OTML i no nap long stap tasol na lukluk nating long dispela bikipela taim bilong olgeta

wol bai lukim bikos em i dia tumas long nesen. OTML i mas givim han tu long wanem hap em i nap helpim, olsem em i save mekim olgeta taim, long kamapim wanbel long nesen insait long we bilong spots. Antap long olgeta samting, spots em i wanpela nambawan samting bilong karim wok developmen bilong Papua Niugini. OTML i bin save sapotim Papua Niugini Spots Federesen na Olimpik Komiti (PNGSFOC) samting olsem 10-pela yia nau, kain olsem 2003 Saut Pasifik Gems long Fiji, 2005 Mini Saut Pasifik Gems long Palau, 2008 Olimpik gems long Beijing, na 2012 London Olimpik gems. OTML i bin stap olsem Brons Sponsa bilong PNG Kumuls long 2008 Wol Kap kempein.

"Dispela helpim long PNG i go pas long 2015 Pasifik Gems na long rereim ol ron resis lain bai i go yet na em i strongim moa PNG Spots long kamap gutpela moa bikos spots em i bikipela hap bilong kantri i develop," Mista Parker i tok moa.

Fainol lista bilong Tabubil Diggers

OL I makim pinis fainol tim lista bilong Tabubil Diggers, bihainim wanpela pilai bilong ol Probables na Possible long las wiken Sarere.

Ol Probables i bin winim pilai wantaim skoa mak long 24-11, na 11-pela pilai long sait i win, em long Diggers taim, is tap long dispela fainol lista.

Tabubil Diggers bai pilaim tupela mets o pilai agensim Kiunga Cat Fish. Namba

wan gem em ol bai piliam long Kiunga long dispela Sande, Julai 14 taim namba tu gem bai kamap long Tabubil long Sande, Julai 21, 2013.

Hia em lista bilong fainol Tabubil Diggers tim: Bubec Wakpi (Brothers), Niven Ginua (Tarangau), Clifford Mek (Eagles), Rodney Nana (Rodney Nana), George Vanua (United), Jacky Tony (Eagles), Tom Nelson

(United), Andrew Vaso (Country), Junior Tomba (Brothers), Benjamin Pereno (Brothers), Nolen Aeno (Country), Uмба Kuange (Tarangau), Michael Kasp (United), Francis Matmillo junior (United), Lingston Lingham (Brothers), George Kamani (Tigers), Justine Toniolo (Country), Caleb Siku (Tarangau), Titus Gereea (Brothers) na Arnold Tubavai

(United).

Ol memba bilong tim menesmen em long Ferdinand Nongkas (Kosa), Ben Levi, Bagelo Rei (Ol tren), James Netepa (Tim menesa), Pelius Undi (Tim dokta) na Peter Naipo (Tim referi).

Bihain long tupela mets, ol bai wokim fainol pilai lista na ol bai go insait long Sauten Zon trail ol bai holim long Kwikila long Sentrel Provins

long Mande, Julai 29, 2013.

Presiden bilong Tabubil Ragbi Lig Asosiesen (TRFL), Jacob Akuzakano, i tok i kam inap nau, nogat bisnis haus long Tabubil i tokaut long sapotim ol Diggers.

Presiden bilong TRFL i apil nau long sampela lain i sponsaim long helpim ol Diggers i kam long tunamen wantaim mani long baim balus tiket, ples bilong slip long en, kaikai, ol jesi o yu-



Ol ples mas sanapim ol strongpela spot resis

YUMI save lukim planti ol spot pilai na resis i save ron gut long ol taun na siti, ol ples tasol i save pundaun long dispela.

Ol spot pilai na resis i gutpela bikos ol i save pulim rausim ol yangpela long ol pasin nogut insait long ol komyuniti bilong ol.

Ol pilai resis i gat ol arapela gutpela samting tu.

Ol dispela samting em strongim pasin timwok, rispek na luksave long ol wan-pilaia bilong ol, serim aida na save, na lis i go yet.

Long sait bilong painim ol nupela spots talent, dispela em i gutpela ples bilong ol lain i save raun lukluk long painim ol nupela spots manmeri.

Hevi nau i stap long planti hap long kantri, em long ples, ol i nogat ol strongpela spots kompetisen.

Na taim mi tok spots kompetisen, em i mi minim ol spots kompetisen i save ron olgeta taim.

Mi lukim planti ol spots pilai na resis, we i save kamap bihainim wanem taim ol i kism sapot long kamapim.

Sapos i nogat sapot i stap, ol bai lusim na wetim narapela taim gen, we i gat sapot long mekim.

Pasin politik i stap long as long planti ol spots pilai i save kamap long kantri.

Nau mi raitim dispela ol tingting i stap, i gat ol spots kompetisen i wok long kamap long kain kain hap long kantri.

Tasol bikipela askim mi gat, em bai ol i kamap olsem olgeta taim, o bai ol i pundaun na lus nabaut?

Tru tumas, i gat ol arapela samting tu i save kamapim dispela hevi. Nogat inap savemanmeri, nogat gutpela sapot i kam long komyuniti, na ol arapela pasin nogut i save bagarapim ol spot pilai long ples, olsem pait, ol yangpela i nogat rispek long ol bikipela manmeri, nogat gutpela ples bilong pilai spot, na planti ol arapela samting tu.

Olgeta dispela ol hevi, i ken senis sapos ol pipel long ples i gat gutpela trening long kamapim na lukautim ol dispela kain spot pilai resis.

Ol dispela lain, em ol spots administreta.

Ol i mas gat inap save na strong long lukim kamap bilong ol spot pilai, olgeta taim.

Painim mani sapot i mas kamap olsem wanpela wok bilong ol tu.

Ol komyuniti spot na memba husat i afiliet i go long ol kompetisen, i mas kamap ol fainensal memba, na dispela bai strongim wok fanresing bilong ol.

Ol dispela samting bai no inap kamap samting trutru sapos ol i no kism gutpela trening.

Taim olgeta samting i stret, spots long komyuniti bai ron gut, na ol pipel bai luksave long veliu bilong spots.

Taim ol pipel i gat inap trening, bai ol i gat save long strongim kamap na pilai bilong spots insait long komyuniti, na strongim luksave long strongim spots insait long komyuniti.



Moa oil na meat insait

'Fles Garap putim ai long Wol taitol

Nicky Bernard i raitim

PNG Muay Thai na WMC na WKBF sempion Lee Flash Garap, bai lukim long bikpela pait bilong em, we bai kamap long Pot Mosbi long Ogas 1.

Garap, husat i holim dispela taitol bilong PNG bai pait wantaim sempion man bilong Thailand husat i holim Wol Kik Boksing Federesen taitol long hevi bilong 64.5kg

Lee Garap i bin pait 90-pela taim olgeta tasol dispela sempoin man bilong Thailand i pait 480 pait pinis, tasol dispela bai i no inap stopim Lee long kisim em na paitim long kantri bilong em yet PNG.

"Mi wok long trening gut tru long redi long dispela pait, na

mi gat bilip olsem bai kaikai bilong kamap long taim bilong pait long Ogas", Garap i tok.

Garap, bin go tren long Australia aninit long lukaut bilong Brisbane bes pait man, Bruce MacFie husat i laikim tru Lee long we bilong pait bilong em.

Dispela pait we bai kam long Papua Niugini long Ogas 1, bai stap long Sports Inn na Glen Armstrong bilong Air Niugini em wok long promotim.

Garap nau i wok long painim ol sponsa bilong dispela bikpela pait na em askim ol bisnis manmeri long helpim.

Em tok tenkyu i go long sampela sponsa husat kam pinis na helpim olsem, Sport Minista, Live jim, L&A Konstraksen na Sport Inn.



Ol spot poto na Digicel Kap dro - Pes 26

Spot Raun - Pes 27



PMV

DIESEL OIL



BOROKO MOTORS

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2659
KOKOPO	☎	982 8193
GORDKA	☎	532 3552

Email: info@borokomotors.com.pg
Website: www.boroko-motors.com

PMV OIL BILONG YUMI